



天津交通銀行同
人俱樂部圖書室

左文襄公奏稿卷十一

起同治三年甲子十月訖十二月

目錄

乍浦頭圍二口未能設關啟微摺

温州海關稅務請仍由溫處道就近徵解片

兩浙商鹽議請試行運票摺

賊竄閩疆撥兵援剿摺

請 敕浙江撫臣速赴本任片

漳賊退往龍巖官軍仍應速援片

特保政績卓著知府摺

覆陳杭州殉難大員死事詳細情形摺

奏稿卷十一目錄

委高連陞署浙江提督即帶兵援閩片

福建臬司勦賊受傷見無下落遴員接署摺

署浙江臬司劉典鹽運使李榕均請開缺另 簡片

請將協濟楊岳斌赴甘行資抵解甘餉摺

請將本任養廉作為京餉報解片

查明繆梓死事情形請 賞還卹典片

請停止廣東解浙協餉片

克復杭州各城出力員弁兵勇請 旨獎卹摺

外國助餉出力員弁懇 恩獎敘片

請將所保員弁免其加考并 敕部毋庸核減片



辦理餉需各員請 旨獎勵片

遵保巡洋獲盜并勦辦台匪出力各員摺

議減杭嘉湖三屬漕糧大概情形摺

請緩開北新關由釐捐撥抵關稅摺

敬舉人材摺

錫封伯爵敬懇 允收成命摺

遵將提鎮各員出具密考摺

覆陳李元度被參情節摺

覆陳被參道員鄧輔綸巡禦不力請 旨革職片

交卸撫篆赴閩督師勦賊摺

奏稿卷十一目錄

二

援閩軍餉由浙籌解片

敬陳浙江應辦善後事宜片

督師行抵浦城見籌勦辦情形摺

請將署浙江臬司劉典開缺幫辦軍務并遴員接署臬司運

司篆務片

再陳懇辭伯爵摺

攻守龍巖漳平壘勝及由連城進勦先勝後挫情形摺

查參畏賊玩法將弁片

請 敕漳州鎮總兵李成謀速赴本任片

獲辦行劫洋盜摺

查明臬司殉難詳細情形懇
恩優卹摺
密陳提鎮司道府年終考語摺

奏稿卷十一目錄

乍浦頭圍二口未能設關啟徵摺

同治三年十月初三日

奏爲乍浦頭圍二口未能卽議設關啟徵情形恭摺具奏仰祈

聖鑒事竊照浙海關兼隸平湖縣之乍浦海口因離甯較遠稽察難周額徵關稅向委杭嘉湖道就近監徵一年期滿仍由護關甯紹台道彙核計考該口內通嘉湖蘇省外達東南兩洋在昔承平之時商賈輻輳凡福建木植閩廣糖貨以及四川各省藥材雜貨無不遠涉重洋往來轉運并有採買東西洋銅船販運土洋貨物進出兩稅歲以爲常均爲關稅大宗此外本港各船尚有魚鱖等貨稅每年額徵正盈稅銀二萬八千二十三兩五錢一釐又兼管海鹽縣之頭圍二口年額徵銀五百二十二兩三錢二分五釐以

奏稿卷十一

一

浙海關甯紹溫台杭嘉等屬各口年定統徵正額盈餘稅銀七萬九千九百餘兩總數而計乍浦頭圍口幾居統關稅銀十中之四課額雖重徵解尙裕閒或年穀不登客貨銷滯偶有關額亦由甯關各口通算彌縫此乍浦關向徵稅務之情形也自咸豐三年金陵淪陷商貨梗阻又東洋銅船連年減運以致進出貨稅漸形減少每年關徵稅銀五六千兩多至一萬餘兩不等甯關自顧不遑未能如前挹注歷任前道賠項之鉅半由於此咸豐十年髮逆近擾嘉蘇狼氛四逼是年一屆關期僅徵稅銀八千六百餘兩關額更鉅咸豐十一年三月初八日卽關期首季之第一日乍浦失守關稅無徵三年以來未能設復嘉湖郡縣克復以後乍浦城市蕭

條關屋僅存瓦礫客商不至貨稅毫無臣於四月間附奏常洋兩稅銀兩畱浙充餉片內聲明乍浦初復頭圍二口未能設關啟徵在案刻下時逾數月應體察情形酌量辦理飭據護海關甯紹台道史致諤查明覆稱乍浦關口額稅甚鉅當此庫藏支絀苟可設法啟徵自當殫力籌辦何敢畏難苟安曠懸課稅特是該口在未經失守之時銅船停運商艘不前進出貨稅已屬年不足額積疲本難驟返失守之後商船四散卽如建木一項本在乍浦開有場號歲運來乍轉售各路今則遷開上海運木到滬行銷甚捷又如閩廣糖貨近皆載運洋船各省藥材雜貨亦因道路多梗改由別處販運雖經設法招徠而地方彫敝已極民屋焚毀居多城外一

奏稿卷十一

二

片荒地紳民未歸商旅亦皆裹足若遽設關啟徵先須改造關屋選派書役稽查無論籌款爲難而無貨進出卽無稅可徵經費徒糜關成虛設體察見在情形尙須寬以時日逐漸招徠勢難卽議設關應俟民業稍安商販招集再行酌量試辦等情具詳請奏前來臣覆核無異除飭俟商貨稍通卽行設關啟徵不得藉詞延緩曠懸稅課外謹將乍浦頭圍二口尙難設關啟徵緣由專案恭摺具奏伏乞

皇上聖鑒訓示謹 奏

議政王軍機大臣奉

旨另有旨欽此

温州海關稅務請仍由溫處道就近徵解片

同治三年十月初三日

再温州海關稅務向由甯紹台道派人徵收因相距較遠流弊無從稽核臣上年奏請改歸溫處道就近徵解毋庸歸甯紹台道兼管以昭核實曾奉

旨允准在案茲准戶部咨開浙海關每年應徵正額銀三萬五千九百零八兩二錢三分盈餘銀四萬四千兩向由浙江巡撫派委甯紹台道兼管其大關及所屬各口岸徵收稅銀俱由該道彙總統算年滿時歸入浙海大關報解其額定稅數儻有短收著落該道賠補歷經辦理在案茲請改歸溫處道就近委員駐關徵解毋庸歸甯紹台道兼管是一關稅務委派兩道分收將來稅額如有短絀轉使甯綴台道得以藉口實與歷辦成案不符應仍由甯紹台道派員前往徵收隨時將所收稅銀解交浙海大關彙核辦理以專責成於同治二年六月十五日具奏奉

旨依議欽此臣查溫州海關額徵正餘銀九千五百六十六兩零

瑞平口額徵正餘銀二千五十餘兩向由甯紹台道派撥關書經徵按季報解從未報有盈餘上年改歸兼署溫處道周開錫派員徵收將一切陋規概行裁革自上年正月二十八日起至年底止實徵庫平銀二萬二千五百餘兩雖關稅旺絀時有不同而較之甯紹台道派撥關書經收殊為核實見須整頓稅務似無庸拘照成案辦理擬請將溫州海關稅務暫仍由溫處道就近派員徵解

每季徵銀若干由溫處道移知甯紹台道歸入大關彙總報銷應
解部飯銀兩亦從關稅內劃出撥歸大關彙解以重稅課而昭覈
實除咨部查照外理合附片具奏伏乞

聖鑒施行謹 奏

議政王軍機大臣奉

旨另有旨欽此

兩浙商鹽議請試行運票摺

同治三年十月初三日

奏爲兩浙商鹽議請試行運票以資整頓而裕課餉恭摺奏祈
聖鑒事竊照兩浙年額應銷正票引目八十萬五千三百九十六
道照改餘引八萬道餘引十五萬道每年額徵正餘引課三十二
萬數千兩有奇向由商人認數領運先課後鹽按綱造報奏銷因
歷來行銷未能足額每以內外雜款墊報全完道光年間岸情雖
極疲滯通綱牽算尙能銷至五六成不等自咸豐三年金陵失陷
淮海私鹽乘機侵灌杭嘉松三所銷數驟減甚至片引不銷所恃
紹所引地銷暢加以辦理西鹽融銷淮界勉力措拄尙不至全行
廢墮至咸豐十年以後安徽之徽州府廣德州暨江蘇之蘇常松

奏稿卷十一

五

太各府州以次不守繼而浙省告陷所屬郡縣幾無完土官商星
散竈戶逃亡奸民投隙而入公然以販私爲恆業其時徧地賊蹤
無人過問自浙東郡縣先後克復以來始飭紹興設局暫行試辦
票鹽然所辦僅止一隅爲數無幾本年二月間大軍進克省城嘉
湖相繼克復刻下全浙肅清居民漸次復業亟宜實力整頓以冀
改復舊觀無如案牘旣全行燬失商竈又大半彫零間有一二舊
商亦皆避寇甫歸赤貧如洗勢難責令照舊運銷是見在兩浙鹽
務不但求往日之暢銷不可得卽欲如咸豐八九年之情形亦勢
有不能與其仍積疲之後相率因循不若乘更始之時別籌補救
擬請杭嘉紹松四所一律試改票鹽無論新商舊商但能納資到

庫卽給票認地行運并於各府設立府局稽查銷數所收課銀全數提作正課解充軍餉內外雜課概行停支其萬不能不放之款隨時酌核支給作正開銷惟改引爲票未能限以定額能否暢旺尙無把握應以同治四年正月爲始試辦一年如果行之有效再行奏請遵行見在甫經試辦各所情形不同所收票課多寡懸殊且有應行分解江省釐款勢難一律尙須隨時更改應俟試辦數月後畫一釐定另行奏定章程至票運不行之地或由官運或議招商應察看情形核實辦理總之創辦之始首重緝私以疏票引痛革浮費以紓商困核減賣價以敵鄰私嚴查煎數以杜影射舍此四者別無良策據兼署鹽運使蘇式敬詳請先行具奏前來

臣

奏稿卷十一

六

查兩浙鹽務自遭兵燹商竈流離各口岸銷數疲敝已極若不暫議變通辦理必致無可挽救合無仰乞

恩施俯准將杭嘉紹松四所一律改行票運如果試辦有效再行酌定具奏請

旨遵行除咨明吏部戶部將應頒額引暫緩飭發并請將運司以至府廳州縣督銷經銷處分暫免核計考成外合將試辦票運大略情形恭摺具奏伏乞

皇上聖鑒謹 奏

議政王軍機大臣奉

旨另有旨欽此

賊竄閩疆撥兵援剿摺同治三年十月初五日

奏為江西廣東諸賊繞竄閩疆見籌撥兵援剿恭摺仰祈

聖鑒事竊逆賊李世賢汪海洋兩股疊經江西剿敗然黨夥甚眾

時出沒江粵邊界臣在杭州距江西粵東各邊二千餘里於賊蹤

一切未得確耗昨連接福建撫臣徐宗幹藩司張銓慶函報臬司

張運蘭總兵關鎮國將瑞金踞逆擊退後賊之入粵者復由廣東

大埔翻山竄犯汀屬武平縣境張運蘭聞賊逼汀界即率所部三

旂由武平進剿詎賊已由小路抄入武平縣城張運蘭回軍轉戰

賊大股突至眾寡不敵遂至失利賊即分股竄陷龍巖州南靖縣

直逼漳州府城土匪游勇內應漳州府城即於九月十四日失守

奏稿卷十一

徐宗幹見調林文察回扼泉州臣查漳州龍巖失陷汀州所屬亦

徧地賊氛北與延平永春毗連南與廣東潮嘉接壤見江西瑞金

會昌尚有賊踞關鎮國見駐汀州康國器見駐邵武之軍均未可

撤動撫臣徐宗幹調泉廈各處官兵六七千人分防興泉并通永

春等處兵單力薄殊為可虞臣得報後即飛飭提督黃少春副將

劉明珍兩軍四千五百人由衢州取道浦城赴邵武一帶接防以

便騰出康國器全部進剿漳州飭援江各軍除王德榜王開琳兩

軍仍畱吉安一帶防剿外劉典一軍八千人即由建昌取道以赴

汀州惟此兩路由江浙邊界赴閩山徑崎嶇深恐緩不濟急見逆

賊已踞漳州有下趨之勢省垣為根本重地興泉兩郡為省城門

戶豈可稍涉疏虞再四思維應由海道出師以期便捷當飭提督高連陞率所部三千五百人馳赴甯波雇坐輪船由海道先赴福建省城察看逆賊趨向相機迎剿以期穩固臣俟各軍拔行後卽擬進駐衢州就近調度所有此次賊竄閩邊漳州失陷詳細情形諒撫臣已奏報在途理合將調派各軍赴閩緣由恭摺馳奏伏乞皇上聖鑒訓示施行謹 奏

議政王軍機大臣奉

旨另有旨欽此

請 敕浙江撫臣速赴本任片同治三年十月初五日

再逆賊入閩入粵雖均為東南大局之害然以形勢言之則入閩之患較之入粵為稍輕如能於閩中殲除淨盡不致流毒他方未始非不幸之幸臣擬俟各軍拔行後即進駐衢州相機調度如局勢必須急進自當赴閩親督諸軍迅速剿辦惟浙撫係臣兼署一切善後事宜猶須次第經理臣既赴閩勢難兼顧應請

敕下新任撫臣馬新貽速赴本任接辦以重職守其馬新貽未到任以前臣如出省所有浙江巡撫篆務可否即交藩司蔣益澧護理伏候

訓示施行謹附片請

奏稿卷十一

旨

議政王軍機大臣奉

旨另有旨欽此

漳賊退往龍巖官軍仍應速援片

同治三年十月初五日

再正拜摺間接據署福建興化府莆田縣知縣吳光漢稟報漳州府城於九月十四日被匪混入大肆焚掠十五日仍退往龍巖興郡民心已漸安定臣維漳州賊退尚係得自傳聞而龍巖與粵東毗連各處均爲賊踞閩省軍情仍屬喫緊所有三路入閩官軍應仍星馳前進俾壯聲援而速戡定理合附片陳明伏乞

聖鑒謹 奏

議政王軍機大臣奉

旨另有旨欽此

特保政績卓著知府摺

同治三年十月初五日

奏爲特保政績卓著知府請

旨獎勵以昭激勵事竊浙江吏治廢弛已久臣蒞任以來力求整頓凡屬官之賢否政事之得失輿論之是非俱默爲存記時加訪察其不職者業經隨時分別撤參其官聲卓著政績昭彰者自應據實臚陳仰副我

皇上澄敍官方至意兼署溫處道温州府知府周開錫自上年奏補温州知府首先裁革道府兩署陋規剔除各屬地漕積弊并疊次拏獲海洋巨盜搜拏台州土匪復創辦溫處台三屬釐務接濟軍餉於吏治軍政靡不刻意講求實屬守潔才長爲道府中不可多得之員署杭州府知府薛時雨由候補同知升署杭州知府本年三月欽奉

奏稿卷十一

上諭仍著隨時察看如果整頓撫綏悉臻妥善卽行奏請實授欽此該員履任已經四月於一切善後事宜及發審案件辦理均極妥協實屬爲守兼優堪膺表率署嘉興府事補用知府候補同知許瑤光於前署諸暨縣任內失守經臣訪查該員平日官聲甚好奏請免罪畱營旋因隨同克復龍游諸暨縣城併案開復原官本年四月委署嘉興府事該郡久爲賊踞民生困苦殊常該員抵任以來於賑撫清糧各事盡心經理并疊次拏獲槍船著名奸匪閻閻賴以稍安實屬廉幹樸勤輿情愛戴可否仰懇

天恩將周開錫開缺以閩浙道員記名請

旨簡放薛時雨實授杭州府知府許瑤光免補同知以知府畱於
浙江補用并免繳捐復銀兩以示鼓勵之處出自

聖裁如蒙

俞允温州府一缺浙省見有應補人員并請由外遴員請補理合
恭摺具奏伏乞

皇上聖鑒訓示施行謹 奏

同治三年十月十三日內閣奉

上諭左宗棠奏特保政績卓著各員懇請獎勵一摺浙江兼署溫
處道温州府知府周開錫於吏治軍政刻意講求爲道府中不可

奏稿卷十一

三

多得之員著開缺以道員畱於福建浙江補用署杭州府知府薛
時雨爲守兼優堪膺表率卽著補授杭州府知府署嘉興府事補
用知府候補同知許瑤光廉幹樸勤輿情愛戴著免補同知以知
府畱於浙江補用該員前於署諸暨縣任內失守業經左宗棠併
案奏保開復原官并著免繳捐復銀兩以示鼓勵餘著照所議辦
理該部知道欽此

議政王軍機大臣字寄同治三年十月十三日奉

上諭左宗棠奏賊竄閩境派兵援剿請催巡撫赴任并漳州賊匪退往龍巖各摺片覽奏均悉江西逆眾由廣東大埔翻山竄犯汀屬武平縣境張運蘭轉戰失利賊分股陷龍巖州南靖縣入漳州府城徐宗幹調林文察回扼泉州左宗棠飭提督黃少春副將劉明珍由衢州取道浦城赴邵武一帶接防以便替出康國器全部進剿漳州劉典一軍由建昌赴汀該督恐緩不濟急已飭高連陞由海道赴福州省城相機迎剿并擬進駐衢州就近調度催新任巡撫馬新貽赴任所籌均甚周妥本日已諭知曾國藩喬松年馬新貽令馬新貽即赴浙省矣浙省接辦善後各事亦關緊要萬一

奏稿卷十一

三

閩省軍情更緊馬新貽一時未能赴浙卽令蔣益澧暫行護理仍隨時兼顧以期無誤漳州踞逆是否退往龍巖各該府州縣等城文武如何下落均著左宗棠徐宗幹查明具奏龍巖與粵東毗連各處俱爲賊踞閩省軍情萬分喫緊著左宗棠催令派出各軍并親督官軍速籌進剿張運蘭一軍雖小有挫失左宗棠徐宗幹仍當督飭該臬司激勵將弁以期再整軍威閩省邊防被賊闌入連陷數城徐宗幹何以先事毫無准備如再有疏失自問當得何罪毛鴻賓沈葆楨等於賊匪竄出境外何以不令諸將跟追畛域分明以鄰爲壑殊非同心禦侮之道著卽飭令在事員弁出境窮追會同閩浙諸軍協力剿洗淨絕根株其瑞金等處踞匪及南雄一

帶竄匪仍著各該督撫認真搜剿勿畱餘孽左宗棠另摺奏保賢員已照所請降旨允准惟記名道府與定章不符已將該員交軍機處存記候旨簡用并明降諭旨將周開錫開缺改爲以道員畱於福建浙江補用矣將此由六百里各諭令知之欽此

奏稿卷十一

覆陳杭州殉難大員死事詳細情形摺

同治三年十月初七日

奏爲遵

旨覆查杭州殉難大員死事詳細情形懇

恩賜卹仰祈

聖鑒事竊查咸豐十一年十一月賊陷浙江省城所有將軍瑞昌前撫_臣王有齡學政張錫庚副都統傑純按察使甯曾綸等殉難之處均經奉

旨優卹尚有署布政使杭嘉湖道麟趾由知府陞任道員擢署藩司杭州被圍隨同巡撫王有齡登陣固守六十餘日城陷復督勇巷戰力竭捐軀經查明具奏懇

奏稿卷十一

五

恩賜卹嗣承准軍機大臣字寄同治三年四月初七日奉

上諭署布政使司麟趾據奏訪聞於城破時殉難仍著左宗棠查明該員死事詳細情形具奏再降諭旨等因欽此欽遵轉飭確查去後茲據布政使蔣益澧具詳據署錢塘縣知縣祕雲書詳據家人李榮稟稱前署浙江布政使鹽運使銜杭嘉湖道麟趾咸豐十一年九月間粵匪圍攻省城隨同前撫_臣王有齡登陣守禦晝夜巡防至十一月二十八日黎明該署司巡視堞口適大股逆匪撲犯武林門該署司卽帶親軍疾趨礮臺開放大礮詎知賊已陷城該署司旋卽在城殉難該署司之母瓜爾佳薩克達氏投水自盡第二女時年十歲第五子時年六歲已捐職知府忘其名字均同

時被害伊在場目擊因被擄至湖州今始逃回等情由司查明專案詳請具奏前來臣查署布政使杭嘉湖道麟趾於杭城失陷時力竭殉難洵屬大節凜然見經查明相應請

旨照布政使例議卹其該署司之母瓜爾佳薩克達氏投水自盡其一子一女同時被害節烈萃於一門深堪嘉憫合無併懇

天恩敕部議給卹典以闡幽光所有覆查杭州殉難大員死事詳細緣由理合恭摺具奏伏乞

皇上聖鑒施行謹 奏

同治三年十月二十九日內閣奉

上諭左宗棠奏署浙江布政使杭嘉湖道麟趾於咸豐十一年九

奏稿卷十一

去

月間隨同前撫臣王有齡守城禦賊晝夜巡防至十一月間城將

陷時該員督帶親軍開礮轟擊旋因賊已入城力竭捐軀該員之

母瓜爾佳薩克達氏投水自盡暨該員之子女二人同時殉難洵屬大節無虧深堪嘉憫前署浙江布政使鹽運使銜杭嘉湖道麟

趾著照布政使例從優議卹加恩予諡諡壯入祀浙江省城昭忠

祠并著該旂查明伊子在京尚有幾人於百日服滿後帶領引見伊母瓜爾佳薩克達氏及其子女著一併交部旌卹以彰忠節欽

此

委高連陞署浙江提督卽帶兵援閩片

同治三年十月初七日

再署浙江提督總兵官秦如虎傷疾舉發經臣奏懇

天恩准予回籍調養其所遺提督篆務臣查有記名提督尙勇巴

圖魯高連陞威望素著堪以委署浙江提督惟見在閩省永定武

平龍巖南靖漳州各城均已失陷軍情喫緊臣擬派高連陞於接

署提篆後卽帶所部由輪船馳赴福建省城相機援剿其提督衙

門日行事件卽委提標中軍參將代拆代行除分別飭遵外謹附

片具奏伏乞

皇上聖鑒訓示謹 奏

議政王軍機大臣奉

奏稿卷十一

七

旨知道了欽此

議政王軍機大臣字寄同治三年十月初六日奉

上諭沈葆楨奏鮑超飛援甯都血戰解圍并席寶田一軍剪除湖
逆搜獲偽酋及龍南縣擊賊獲勝各摺片本日已明降諭旨各照
所請獎卹并將提督鮑超賞戴雙眼花翎以示鼓勵矣該撫卽傳
知該提督益圖奮勉將康侍等逆悉數誅鋤肅清江境用副委任
席寶田一軍剪除湖逆搜獲偽于王洪仁玕等多名據生擒賊供
祐逆李遠繼已殞於陣幼逆洪福瑱或謂死於亂軍或謂自經山
僻俱屬渺茫不定僞主將羅逆王逆亦俱漏網恐遺孽復萌再有
句結又形費手著沈葆楨卽飭席寶田等確切查明幼逆所在認
眞搜捕以淨根株左宗棠徐宗幹亦當督飭各路地方將領嚴密
捕拏爲一勞永逸之計欽此

議政王軍機大臣字寄同治三年十月十一日奉

上諭本日據沈葆楨奏洪幼逆被擒鮑超一軍攻克瑞金縣城追賊至距城三十餘里之埜田直達閩界已知會閩省防軍一體截剿等語仍著鮑超乘破竹之勢督軍出境會合閩省防軍將此股敗匪追捕淨盡以竟全功鮑超已加恩賞給一等子爵所部將領員弁兵勇著沈葆楨咨明曾國藩查明保奏候旨施恩并嚴飭各屬加意嚴防以杜逸匪回竄洪幼逆一犯已有旨諭令即在江西省城凌遲處死李秀成之子李其祥著俟及歲時照例辦理欽此

福建臬司剿賊受傷見無下落遊員接署摺同治三年十月十四日會銜

奏爲福建臬司剿賊受傷見無下落遊員接署臬篆帶兵赴閩會合各軍進剿恭摺奏祈

聖鑒事竊照福建臬司張運蘭前因閩省邊防喫緊經臣奏調統

帶所部由粵赴閩於八月二十六日馳抵汀郡旋即會督各軍越
勒江西瑞金踞匪因汀屬武平被匪窺竄張運蘭率部馳援酌酉
弁勇協守縣城自率三旂湘勇扼紮下壩地方迎剿九月十一日
辰刻匪眾屢次竄撲均經擊退詎該逆另股由旁路松源一帶直
犯縣城卽於巳刻失陷張運蘭折回馳救該匪四面圍裹因勇力
較單死傷枕籍張運蘭被賊矛刺傷重落馬親勇馳往救護復被

奏稿卷十一

逆賊衝散有隨帶親勇湯友德馳回汀郡赴總理老湘營務處選
用道張恆祥縷述情形卽據該道具稟前來臣查武平失後永定
南靖龍巖俱陷漳郡復被土匪勾引髮逆占踞業經臣調撥勁旅
水陸馳援該臬司張運蘭久經戰陣剿匪向稱得力此次孤軍挫
陷身受重傷尙無實在下落所有福建按察司印信見存汀州郡
城刻下該處軍情緊急閩省無知兵大員堪以接署惟查記名臬
司王德榜久歷戎行謀勇兼備先經臣調赴江西剿賊見在吉安
贛州一帶堪令速帶所部臣標五營卽由江西瑞金入汀會合各
軍攻剿并接署福建臬司篆務以資得力除檄飭遵照并確查張
運蘭下落另行具奏外理合會同福建巡撫臣徐宗翰恭摺馳奏

伏乞

皇太后

皇上聖鑒訓示謹 奏

議政王軍機大臣奉

旨另有旨欽此

奏稿卷十一

三

署浙江臬司劉典鹽運使李榕均請開缺另

簡片

同治三年十月十四日

再浙江臬司劉典上年聞訃丁憂因皖浙軍務正值喫緊經臣奏請改爲署任仍畱軍營帶兵剿賊嗣皖南軍務稍定復奏明准其回籍治喪本年二月逆賊闖入江境勢甚鴟張臣又飭其在籍募勇三千入江助剿旋奉

恩命幫辦江西皖南軍務轉戰數月幸江省全境肅清該臬司呈請開缺終制并以母氏年逾七十懇請終養等情前來臣查該臬司至性過人再四瀝陳本應據情代爲奏請惟見在賊由江西粵東竄擾閩境連陷數城臣已飭該臬司由江西建昌赴汀州一帶相機剿辦賊事遲速尙未可定自應俟閩省軍務肅清再行請

奏稿卷十一

三

旨辦理其所署浙江按察使應請先行開缺另

賜簡放又浙江鹽運使李榕

簡放兩年因在安徽軍營未能履任運司篆務本年三月奏請暫以杭嘉湖道蘇式敬就近兼署見改行票運釐定新章必須責有專司方足以資整飭浙省見無熟悉鹽務大員李榕未能到任應請

旨另簡賢員補授斯缺俾臣得稍收指臂之助理合附片具奏伏

乞

聖鑒訓示施行謹 奏

議政王軍機大臣奉

旨另有旨欽此

奏稿卷十一

三

請將協濟楊岳斌赴甘行資抵解甘餉摺

同治三年十月十四日

奏爲浙江籌餉維艱近復派撥重兵馳援福建裹糧以行應解甘餉無從籌撥請將協濟楊岳斌赴甘行資抵解甘餉恭摺仰祈

聖鑒事竊臣於九月二十三日欽奉

寄諭浙江應解甘餉昨據左宗棠奏地方彫敝請敕改撥見在雖令戶部速議具奏惟甘省餉項奇絀仍著左宗棠無論如何爲難先行設法籌解若干以濟急需欽此又於十月初八日欽奉

寄諭楊岳斌奏瀝陳回籍募勇籌備餉項情形一摺著左宗棠於本省籌撥銀八萬兩解交楊岳斌行營以便該督迅速募勇起程等因欽此旋准戶部咨錄原奏內開浙省郡縣甫經次第克復該督所陳自係實在情形惟甘省軍務萬緊需餉甚亟應將前次奉撥甘餉銀二三十萬兩內先行籌解十萬兩趕緊派委委員探明道路解往甘省交納以救燃眉其餘奉撥銀兩陸續籌出再行解往於九月二十二日具奏奉

奏稿卷十一

三

旨依議欽此伏查浙省自經兵燹彫敝萬分新復地方不獨錢糧無可徵收且須另籌賑撫經費臣軍餉項截至本年二月底止積欠或九十箇月或七八箇月不等至今未能清釐新餉又欠兩月茲幸全境肅清擬將勇丁陸續裁撤爲節省餉需之計而裁撤一營總須銀二三萬兩計自八月以來新舊共撤四十餘營需餉四十餘萬兩尚有數營應撤因餉項不敷未能即時撤遣本省軍需

已形支絀復加以援江援閩各營餉項俱由浙省支應尤覺竭蹶萬分應解甘餉此時實無從籌撥卽楊岳斌奏撥行資八萬兩亦難如數措解臣亦知甘省需餉孔殷楊岳斌行資萬不可緩何敢稍事諉延惟值此庫藏空虛本省欠餉尙難籌給合無仰懇

天恩俯念浙省彫敝一時無鉅款可籌所有應解甘餉暫免協撥其楊岳斌行資臣當於無可設法之中飭司勉爲勻撥銀四萬兩於十一月內解交湖南應用卽請作爲浙省協甘之餉理合恭摺具奏伏乞

皇上聖鑒訓示施行謹 奏

議政王軍機大臣奉

奏稿卷十一

五

旨另有旨欽此

請將本任養廉作爲京餉報解片

同治三年十月十四日

再臣於十月初三日接准戶部咨開同治三年九月十五日奉

上諭戶部奏本年京餉請嚴收各省趕解以供開放一摺閩海關欠解稅銀十萬兩福建欠解茶稅銀二萬兩著接奉此旨後各將未解銀兩務於十二月內儘數解齊倘仍飾辭宕延致誤要需卽由該部查照奏定章程指名嚴參等因欽此臣當卽飛咨將軍撫臣一體遵照去後伏維閩省本年兩被賊擾籌餉徵兵萬分支絀昨接徐宗翰函稱以軍務緊要面商英桂擬暫由閩海關借撥關稅銀兩以應急需而浙省派往援師每月餉項臣尙飭由浙省支發福建僅供本省軍需已彌形竭蹶見奉飭催京餉恐難如數解齊京師待餉孔殷豈敢膜視臣上年三月蒙恩簡授閩浙總督以來閩省按月解送本任七成養廉計尙存庫平銀一萬兩應卽作爲京餉先行報解臣已將此項銀兩發交藩司轉發甯紹台道由票號兌京交納伏乞敕部查照理合附片具奏伏祈

聖鑒謹 奏

議政王軍機大臣奉

旨另有旨欽此

議政王軍機大臣字寄同治三年十月二十三日奉

上諭左宗棠奏臬司查無下落遴員接署臬篆并請將協濟楊岳斌行資抵解甘餉存庫養廉銀兩作爲京餉匯兌解京及劉典李榕均請開缺另簡各摺片覽奏均悉張運蘭馳援武平縣城孤軍挫陷身受重傷至今尙無下落所有福建按察使印信見存汀郡刻下該處軍情緊急自應遴選知兵大員前往接署著照左宗棠所請福建按察使卽著王德榜署理并飭令速帶所部由江西瑞金入汀會合各軍實力攻剿毋少遲誤其張運蘭實在下落并著左宗棠徐宗幹查明具奏劉典見由左宗棠檄赴汀州剿賊軍務喫緊之時未能遽准終養其浙江臬司本任卽毋庸先行開缺見

奏稿卷十一

三

署臬篆之林聰彝如果閱歷尙淺於此缺不甚相宜卽著左宗棠另派賢員接署或於鄰近省分另有所知人才亦可酌保數員候旨簡用李榕見在皖北帶兵一時未能履任業准其開缺浙江運司已簡放楊昌濬所遺浙江糧道一缺并令周開錫補授矣馬新貽已屢經寄諭催令赴任著左宗棠再行咨催勿令延緩左宗棠所陳浙江籌餉維艱甘餉無可措撥請籌銀四萬兩解交楊岳斌應用抵作甘餉等語自係實在情形第楊岳斌募勇赴甘非厚集成鉅款難以成行入甘以後協餉尤關緊要仍著左宗棠於無可籌畫之中極力設法將欠解之四萬兩陸續解赴湖南以符前撥八萬原額其甘省協餉并著源源籌解以維大局毋許藉詞推諉

京餉關繫緊要仍著英桂徐宗翰遵照戶部原奏於閩海關及茶
稅欠解項內迅籌解納至養廉係左宗棠應得辦公之項該督懇
將養廉一萬兩抵餉解京之處礙難允其所請如業已匯兌來京
卽著英桂於關稅項下如數撥還可也欽此

奏稿卷十一

美

查明繆梓死事情形請

賞還卹典片

同治三年十月十四日

再遵查前署浙江鹽運使金衢嚴道繆梓在浙服官多年素稱廉幹咸豐八年閒保守衢郡尤著勞績十年二月閒杭城被圍兩次派勇縋城擊賊并無堅不出戰之事迨城陷時登城拒戰身受多傷遇害最爲慘烈前撫臣王有齡於甫經莅任之始輕聽浮言奏請將該故員撤銷卹典實屬一時疏誤合無仰懇

天恩給還卹典以慰忠魂而彰公道理合附片陳明伏乞

聖鑒施行謹 奏

同治三年十月二十三日內閣奉

上諭前因王有齡奏稱陣亡前署浙江鹽運使金衢嚴道繆梓偏

奏稿卷十一

无

執已見創議株守以致省垣被陷請將該故員卹典撤銷業經奉旨允准嗣據浙江舉人趙之謙等以該故員於杭城失陷遇害最慘王有齡原參係屬傳聞之誤懇將該故員應得卹典開復遣抱告赴都察院呈訴當經降旨交左宗棠查明具奏茲據左宗棠奏稱查明該故員在浙服官多年素稱廉幹保守衢郡尤著勞績杭城被圍兩次派勇縋城擊賊并無堅不出戰之事及城陷時該故員猶登城拒戰身受多傷遇害尤爲慘烈王有齡奏參撤銷卹典實屬一時疏誤請將前得卹典給還等語繆梓著賞還卹典以慰忠魂該部知道欽此

請停止廣東解浙協餉片

同治三年十月十四日

再臣欽奉同治元年正月初四日

上諭廣東粵海關撥解浙江月餉十萬兩諭勞崇光等或由江西轉解左宗棠軍營或由海道駛運上海由曾國藩轉解左宗棠軍營總期得以迅籌接濟俾利師行等因欽此旋經曾國藩奏請開辦廣東釐金凡釐務應得之餉先解浙江軍營其次則解安徽軍營其廣東協浙月餉十萬兩即在釐金項下抵除仰蒙

恩諭允准

特簡都察院右副都御史晏端書馳赴廣東督辦分批撥解皖浙軍營在案臣查廣東協浙之餉自元年正月奉

奏稿卷十一

三

旨之日起截至本年八月底止連閏共計三十三箇月應協浙餉三百三十萬兩除道員義泰於同治元年領解廣東協餉五萬五千兩又官捐銀五千兩除短平色外實共收銀五萬一千五百四十七兩六錢一分係前撫臣王有齡飭赴廣東催提應歸從前欠餉結算外臣接任後僅收廣東撥給蔣益澧行資銀六萬兩又採辦洋槍洋藥銀一千兩又前後十二批共解釐餉二十四萬兩

臣

因曾國荃軍營需餉甚亟又於釐餉內分撥二萬兩解赴金陵計浙省共收粵餉二十八萬一千兩其釐金項下實僅收二十二萬兩曾國藩前奏截至八月底止共收廣東釐餉一百二十萬兩是

臣軍所得不過十成之二見在浙省軍務肅清所有前項協餉自

應停止理合附片陳明伏乞

聖鑒謹 奏

議政王軍機大臣奉

旨另有旨欽此

奏稿卷十一

三

克復杭州各城出力員弁兵勇請

旨獎卹摺

同治三年十月二十日

奏爲遵將克復杭州餘杭海甯桐鄉富陽各城出力員弁兵勇請旨獎敘以勵戎行事竊臣前准兵部火票遞到同治三年三月十二日內閣奉

上諭左宗棠奏攻克杭州餘杭兩城一摺所有在事出力將士著左宗棠查明擇尤保奏欽此又奉三月二十日

上諭左宗棠奏攻克杭州餘杭兩城詳細情形一摺其餘出力陣亡各員弁著左宗棠查明分別奏請獎卹該部知道欽此又奉正月十七日

上諭左宗棠奏官軍收復海甯州城一摺其餘出力員弁著左宗

奏稿卷十一

三

棠查明俟克復杭州彙案保奏欽此又奉二年九月初六日

上諭左宗棠奏官軍克復富陽縣城并攻克新橋各壘大獲全捷

一摺所有在事出力水陸弁勇著准其彙案保奏候旨施恩欽此

竊臣軍自上年二月肅清浙東後卽飭蔣益澧會督水陸各軍偪

攻富陽扼勦新橋援賊八月間將富陽縣城攻克蔣益澧卽率所

部直擣杭州臣督各軍進攻餘杭因海甯一城爲杭州東北屏蔽

桐鄉與海甯毗連迺分軍先取海甯桐鄉并會合蘇軍攻克嘉興

府城以孤杭垣之勢復將杭州餘杭城外賊壘次第掃盪本年二

月二十四日兩城卽同時攻克該將士等大小百數十戰使久踞

堅城先後恢復實屬異常奮勉倍著勤勞臣欽奉

諭旨當卽恭錄行知各營茲據開摺彙案請獎前來臣覆核無異除記保以藍翎千總把總外委拔補者咨部註冊外其尤爲出力各員合無仰懇

天恩俯准給予獎敘至疊次打仗陣亡及傷故病故將弁除蔣益澧一軍尙未查覆外其已經查明者并請

敕部照例議卹理合分別開單恭呈

御覽伏乞

皇上聖鑒施行謹 奏

議政王軍機大臣奉

旨另有旨欽此

奏稿卷十一

三

外國助勦出力員弁懇

恩獎敍片

同治三年十月二十日

再此次攻克杭州權授中國總兵法國參將德克碑督軍助勦極肯出力除德克碑已隨摺奏請

獎敍外其所部常捷軍外國員弁茲據開單請獎前來可否仰懇天恩俯准將三品藍翎遊擊法蘭克藍翎都司勒佛材哪維真三員均請

賞戴花翎都司白思格馥才爾拜士碑魯矮守備夾勒乃五員均請加四品頂帶并

賞戴藍翎守備謝克耄微爾美德買勒格千總介思德明盧幣囊五員均請加五品頂帶并

奏稿卷十一

五

賞戴藍翎以示鼓勵之處出自

聖裁理合附片具奏伏乞
聖鑒訓示施行謹 奏

議政王軍機大臣奉

旨另有旨欽此

請將所保員弁免其加考并

敕部毋庸核減片

同治三年十月二十日

再此次攻克餘杭各城所保員弁稍多實因浙東肅清後該將士等從征年餘大小百數十戰克復各城皆彙歸此次辦理臣逐加覆核并無冒濫其隨營文員間有請保免補免選本班者亦皆係從征最久始終出力如蒙

天恩俯准給獎并請

敕部毋庸查照尋常勞績核減又查見在吏部議定章程奏保各員皆須分別填註考語除此次已填註外其克復遂安嚴州金華及上年援皖援江各案皆未註考見各營有已經遣散者各員中亦有續經保升及病故者可否將已上各案免其加考俱照原請

奏稿卷十一

三

給獎之處出自

皇上逾格鴻慈理合附片具奏伏乞

聖鑒訓示施行謹 奏

議政王軍機大臣奉

旨另有旨欽此

辦理餉需各員請

旨獎勵片

同治三年十月二十日

再臣軍入浙之時軍餉無措自浙東肅清後拓地漸廣用兵愈多需餉更鉅維時臣委江西布政使孫長紱署江西鹽道沈元泰於江省籌辦米捐委甯紹台道史致諤於甯波紹興籌辦捐輸粵釐委福建布政使張銓慶將閩省應撥協餉撥解軍前其閩浙總糧臺專司支應轉運及製造軍火器械委湖南暫革道王加敏等妥爲經理極力撙節隨時通融接濟然後臣軍無譁潰之虞得以剋期蕝事該司道等盡心籌畫共濟時艱均屬懋著勤勞深願大局見因閩省軍務方殷入閩各軍餉需仍須由浙接濟亟應將籌餉得力人員請

奏稿卷十一

美

旨獎勵以策將來合無仰懇

天恩俯准將江西布政使孫長紱署江西鹽道沈元泰福建布政使張銓慶浙江杭嘉湖道蘇式敬均交部從優議敘甯紹台道史致諤請加按察使銜并

賞戴花翎已革湖南補用道王加敏請開復原官仍歸湖南補用

賞加按察使銜運司銜江西試用道胡光墉請改發福建以道員補用并請

賞加按察使銜浙江補用知府高卿培請

賞加道銜閩浙總糧臺提調衢州府知府林聰彝請開缺以道員

仍畱浙江補用其協同籌辦浙餉道銜前署福建福州府事汀州府知府胡肇智請以道員畱閩補用見署福州府事准升福甯府知府丁嘉璋浙江候補知府甘炳均請

賞加道銜福建遇缺卽補同知趙均請補缺後以知府補用福建補用同知蔣麟昌請補缺後以知府升用福建候補同知范孟蘭許善器均請加知府銜題升澎湖通判提舉銜福建布政司經歷汪思源請以應升之缺陞用以示鼓勵又王加敏因清辦湖南軍需報銷經前湖南撫臣毛鴻賓奏參暫行革職臣於元年奏調赴浙委辦糧臺事務茲准惲世臨咨覆湖南軍需係分新舊案報銷新案已彙冊於上年造報舊案款目繁雜須分起續辦王加敏承

奏稿卷十一

三

辦浙閩糧臺出力應由浙省奏請開復合併聲明伏乞

皇上聖鑒施行謹 奏

議政王軍機大臣奉

旨另有旨欽此

遵保巡洋獲盜并勦辦台匪出力各員摺

同治三年十一月二十三日

奏爲遵保巡緝溫台洋面并勦辦台州土匪出力各員請

旨獎敘以昭激勸事竊照溫台洋面時有盜船游弋經兼署溫處道周開錫會商護溫州鎮總兵黃載清等雇募艇船出洋勦捕奪獲盜船多隻并生擒盜首二名經

臣

上年四月奏請將出力各員

酌予獎勵奉

旨黃載清著開復革職處分陳登三著以遊擊儘先補用先換頂帶該部知道餘依議欽此本年又雇募輪船出洋巡緝疊獲盜犯多起經

臣

於五月初十日具奏奉

旨知道了著准其擇尤酌保毋許冒濫欽此俱恭錄行知在案又

奏稿卷十一

三

上年勦辦台州府屬黃巖奇田土匪除出力之遊擊謝復雲都司楊應龍隨摺保獎外其餘各員均未請獎嗣十二月間周開錫又派令謝復雲王興貴帶勇馳赴黃巖將匪首管繼湧擒斬并斃餘匪數十名均屬著有微勞據周開錫繕列清摺併案請獎前來

臣

覆覈無異合無仰懇

天恩俯准以示鼓勵理合恭摺具奏伏乞

皇上聖鑒施行謹 奏

議政王軍機大臣字寄同治三年十二月初一日奉

上諭左宗棠奏遵保巡緝溫台洋面并勦辦台州土匪出力各員請旨獎勵一摺浙江溫台洋面時有盜船遊弋經該員弁等雇募

輪船出洋巡緝疊獲盜犯多起又上年勦辦黃巖奇田土匪擒斬
匪首管繼湧斃匪多名在事出力各員均屬著有微勞自應量予
獎勵都司銜夏國忠守備黃金玉均著以都司補用守備銜鄭碧
山著以千總儘先拔補并賞加都司銜通判嚴金清著俟補缺後
以同知仍畱浙江補用廣東試用縣丞陳寶誠著改畱浙江以縣
丞歸候補班補用生員邱祖植著以訓導不論雙單月選用童生
湯樹莖著以從九品畱於浙江補用縣丞高廷熾著賞加六品銜
都司湯昭龍著賞換花翎守備馬太和林浚秀均著賞加都司銜
王興貴著以都司畱於浙江補用并賞換花翎謝有朋著以都司
補用千總謝日華謝福泰黃雲富周有明林發生均著以守備補
用許庭芳著賞加守備銜從九品戴鐸才著以主簿畱於浙江補
用以示鼓勵該部知道欽此

議減杭嘉湖三屬漕糧大概情形摺

同治三年十月二十六日

奏為覆查杭嘉湖三屬徵收漕糧積弊并見籌核減大概情形恭

摺具奏仰祈

聖鑒事竊臣欽奉同治二年六月初三日

上諭浙省疊遭兵燹小民流離失所殊堪軫念自應將該省漕糧
量予減免以示公溥之仁著左宗棠通飭杭嘉湖三屬將實在應
徵漕糧稅則詳細確查各按重輕分成量減奏明辦理欽此當因
杭嘉湖三屬均未克復戶口流亡徵冊燬失應俟地方肅清各就
各地情形分別裁減於上年十二月覆奏在案本年八月湖州克
復浙西一律肅清即與布政使蔣益澧糧儲道楊昌濬商議於省

奏稿卷十一

罕

城設立清賦總局悉心規畫期於周妥查杭嘉湖三府漕額之重
與江蘇蘇松太等蘇松太既議減三分之一則杭嘉湖亦宜仿照
辦理就杭嘉湖三屬徵糧科則言之又以嘉湖為重杭州次之就
嘉湖兩府言之又以歸安烏程嘉善嘉興秀水為最重平湖海鹽
桐鄉石門德清次之長興武康各屬又次之杭屬臨安於潛昌化
新城等縣山多田少較之嘉湖糧賦固輕出產亦遠遜也嘗攷杭
嘉湖三屬賦重之由始於宋季賈似道之官田元代因而增之明
初張士誠據姑蘇兼有嘉湖各郡明祖平張士誠遂用其租籍收
糧已而又括官田之糧均之民田層遞加增民困獨甚我

朝定鼎以來康熙中免三分之一者一年全免者一年雍正六年

又減嘉湖二府額賦十分之一計銀八萬一千餘兩中間偶遇水旱偏災無不隨時蠲緩

厚澤深仁有加無已故民力得以稍紓至乾隆嘉慶年間家給人足曾歷辦全漕道光癸未辛卯以後兩次大水民間元氣大傷賦重之處未能全漕起運遂歲報災歉蠲緩頻仍然

朝廷雖屢沛殊恩而小民未盡沾實惠蓋一縣之中花戶繁多災歉蠲免悉聽經書冊報世家大族豐收者亦能蠲緩編氓小戶被歉者尙或全徵且大戶僅完繳正額小戶更任意誅求遲至廩滿停收卽須改徵折色每石價至五六十文不等以小戶之浮收抵大戶之不足官吏徵收不善小民咨怨有詞故開漕之案往往因

奏稿卷十一

呈

之而起然州縣浮收亦非能盡飽私橐也從前河運之時旂丁需索幫費如咸豐初年每兌漕一石除給報部漕截銀三錢四分六絲外尙須由州縣貼給費錢千文幫費一日不清幫船一日不開州縣惟恐有誤運期不得不浮收以填谿壑而小民苦於苛斂弱者日受追呼桀者或從中持之因而竄入大戶以致小戶日少大戶日多旂丁之索費日重州縣之虧項日積民以完漕爲苛政官以辦漕爲畏途積弊相因官民交困咸豐二年改行海運每石連商船水腳及南北用款統計約需銀八錢有零會奏准以給幫丁漕截抵支水腳其不敷之項按各州縣幫費重輕酌提解省津貼自七錢至四錢不等較河運之時已爲節省茲奉

恩旨敕議核減漕糧將舉數百年積困而紓之崇朝固三郡羣黎所呼籲祈禱而不得者臣等躬逢

盛世若不能博訪利弊之所在而悉心參酌衷諸至當以規永久不獨無以副

朝廷曠古未有之

隆施亦何以慰草野久困思蘇之至意謹就見在漕務應行籌辦大概情形列爲四條敬爲我

皇上陳之一曰減正額浙省杭嘉湖三屬額徵漕白改漕南匠行月等米共一百一十餘萬石徵糧之則大小不同卽浮額之糧亦多寡不一見須分別量減自應先去浮額之甚以除輕重不均之

奏稿卷十一

聖

弊擬各按上中下賦則分別定數如每畝徵米一斗一升以上至一斗八九升者爲上則自六升以上至不及一斗一升者爲中則不及六升者爲下則按科則之重輕分別核減總期於額徵數目酌減三分之一庶科則定而減數因之而均也一曰減浮收向來收漕加耗每石自一二斗至七八斗不等各視花戶貴賤強弱以定收數多寡今額漕旣經減定則浮收之款豈可任其因仍惟州縣辦漕有修倉搭棚紙張油燭之費有倉夫斗級漕記差役飯食之費有內河運米交兌夫船耗米之費有交米書役守候之費一切用款甚鉅且收漕交兌相隔一二月風晾搬轉虧折必多不能不於正漕之外酌留運費以資津貼應俟查明各州縣用項由外

核實辦理其向來加尖加價勒折諸弊自核定之後概行裁革紳民一律均收不得再有大小戶之分庶穀祿平而公私因之而利也一曰籌運費浙省向辦海運每石需費約銀八錢除向給幫丁漕截銀三錢四分六絲抵支外尚不敷銀四錢五分零見正額浮收概行分別核減自未便再由州縣議提津貼擬請將海運經費每石定以八錢爲額除支漕截外不敷之款另行籌足查浙漕如照統減三分之一每年起運之米不過六十萬石上下漕截一款不另核減計可餘銀十餘萬兩又節省給幫本折行月經費食米變價可得銀十二三萬兩又屯田租息及節省幫弁廉俸可得銀數萬兩統計將及三十萬兩足抵海運經費至所動正款八錢

奏稿卷十一

望

按年將動用款目據實奏結應請毋庸造冊報銷以歸簡便并不得逾八錢之數以示限制庶浮費裁而上下因之而利也一曰裁陋規向來州縣收漕一切陋規極爲繁雜此次核定新章應令各州縣據實查明開摺呈送分別裁減庶弊竇清而漕政因之而肅也嗣後非實在旱潦不得再報災歉卽實在民欠亦不得再報墊完而近數十年相沿陋習亦可除矣至應減米數須查明科則方能核定見在地方新復冊籍無存已飭各屬勒限趕造除白糧粳糯爲

天庾正供擬仍照額辦運擬減之數應統於漕糧項下註扣此外南糧行月匠糧等仍各歸各款按成扣減至杭嘉湖三屬漕糧稅

則輕重不同自應查照各縣科則量減再併計總數共減若干伏查各處被擾情形如杭屬之臨安新城於潛昌化湖屬之長興武康孝豐安吉皆路通徽甯受害尤烈室廬盡成灰燼田地久已荒蕪卽招集遺黎亦寥寥可數從前道光年間及咸豐初年辦理漕運每屆皆不過七八十萬石及五六十萬石不等見擬照杭嘉湖全額統減三分之一如能辦理全漕與歷屆尚不相上下惟刻下三屬情形卽照減三分之一明歲新漕亦斷難如數徵納而欲爲經久之計又不能不通計

國賦盈虛以爲定則可否仰懇

皇太后

奏稿卷十一

畧

皇上天恩俯准將杭嘉湖漕糧統減三分之一明歲新漕再酌量辦理之處出自

聖裁至海運經費每石向祇支銷漕截銀三錢四分六絲此次請以八錢作爲定額與部案不符惟查商船水腳及南北用費每石實需銀八錢其餘不敷之項皆係各縣津貼此時不將津貼一項裁革則雖有核減之名仍未能得核減之實故不得不據實懇請
籲懇

聖恩准予漕截并行月屯租各項下照數動支庶漕弊可以盡革又通省地漕銀兩及浙東各屬南米或關係餉需或抵支兵食除正額毋庸查減其浮收之款亦應分別裁革見甯波紹興温州三

府業已定章處州亦經減定其餘各屬應卽一律核減以昭公溥
除俟查明各縣酌減額數另行具奏外理合將議減杭嘉湖三屬
漕糧大概情形恭摺具奏伏乞

皇太后

皇上聖鑒訓示施行再臣於十月二十四日交卸撫篆此摺係由

臣先行定稿是以護撫臣未經列銜合併聲明謹 奏

議政王軍機大臣奉

旨戶部議奏欽此

奏稿卷十一

墨

請緩開北新關由釐捐撥抵關稅摺

同治三年十月二十六日

奏爲浙省地方新復請將北新關暫緩開設按月由釐捐酌撥以抵關稅恭摺仰祈

聖鑒事竊照杭州北新關向設武林門外其水旱城門及附城水陸要口均設稅卡每年額徵正餘稅銀十七萬二千六百餘兩銅銀水腳銀一萬五千三百餘兩本年二月省垣克復前織造鶴昶奏明俟三箇月後再設關試辦嗣於七月十一日啟關迄今已逾三月徵數寥寥而釐稅亦形減色推究其故因向來關書巡役視爲利藪藉端刁索任意抽收商民久已視爲畏途茲當公私罄竭之餘遽行設關書役故態復萌以致商賈裹足不前咨怨更甚疊

奏稿卷十一

吳

據各商呈控以釐捐與關稅雖同爲商所應納然輸於釐局者無畱難詐索之煩輸於關口者有守候措勒之害臚列十款備陳苦況臣知其情狀非誣咨商織造恆延擬以釐金劃抵見收關稅會奏暫停關口徵收以順輿情恆延以事非定制未免爲關吏所持不敢徑決臣維杭州省垣向稱繁富自經兵燹彫敝不堪至今市肆蕭條未能復業卽設法招徠猶難期遽復舊觀若令竭澤而漁各懷疑畏不但百貨翔貴商賈無利可圖卽此子遺之民生計艱難必致益形窘蹙此固事理之不容坐視者也然使關稅能如前

暢旺下有所損而上果有所益

臣

亦何敢擅議更張乃自八九月

月正當關期暢旺之時而該關口極力搜羅所得稅項每月不過

三千數百兩而止卽照此數牽算一年所獲亦不過四五萬兩而虧欠正餘各款常在十萬以外是暫時復設關口下有所損而上并無所益亦何樂而爲此乎臣與在省司道從長集議謹擬於浙江各屬釐捐項下按月劃撥錢一萬串解交織造爲採辦一切工料之需另撥銀一千兩津貼織造司庫庫使等辦公及該衙門書吏匠役紙張飯食各項用費其向解部科飯食卽於每月撥解錢一萬串內由織造酌量解給計每年釐局共撥解錢十二萬串市價約合銀九萬兩又津貼銀一萬二千兩以抵關稅較該關見徵銀數已加倍捷於該關公私均爲有益嗣後如餉需稍裕釐捐有餘尙可量爲加撥以補正額統俟軍需一律告竣釐捐停止再復舊制辦理庶關釐不致并舉商民得以稍紓亦用其一緩其二之義也如蒙

俞允卽請

奏稿卷十一

望

敕下杭州織造速將關口各稅一概暫停毋聽關書懲通別生枝節庶關稅得歸有著而杭州商民永戴

皇仁於無極矣謹會同護巡撫臣蔣益澧恭摺具奏伏乞

皇太后

皇上聖鑒訓示施行謹 奏

同治三年十二月初二日內閣奉

上諭左宗棠奏請將北新關暫緩開設按月由釐捐酌撥以抵關

稅一摺據稱浙省疊遭兵燹彫敝不堪市肆蕭條小民未能復業
卽設法招徠瘡痍猶難遽復若再竭澤而漁不但百貨翔貴商賈
餬口無資卽此子遺之民生計益形窮蹙北新關試辦已逾三月
徵數寥寥實因關胥巡役等向來視爲利藪一經設關故態復萌
藉端刁索以致商民視爲畏途裹足不前請將關稅暫停以順輿
情等語所奏切中地方利弊浙省蹂躪已深正宜休養生息以培
元氣若任令關胥巡役人等私作威福肆意誅求於國課毫無裨
益而閭閻苦累甚深殊非體恤商賈之道著恆延將北新關暫緩
開設關口各稅一概暫停抽收毋得任聽關書等徇憑別生枝節
并著照左宗棠所擬於浙江各屬釐捐項下按月劃撥錢一萬串
解交織造爲採辦一切工料之需另撥銀一千兩津貼織造司庫
庫使等辦公及該衙門書吏匠役紙張飯食各項用費餘著照所
議辦理俟軍務一律告竣釐捐停止再行循照舊章辦理該部知
道欽此

奏稿卷十一

吳

敬舉人材摺

同治三年十月二十六日

奏爲敬舉人材請

旨錄用以昭激勸事竊

臣

前准部咨同治元年九月初四日奉

上諭御史劉慶奏薦舉人材應令分別聲明以備器使一摺前因尚書羅惇衍奏薦舉人材宜認真慎保當經降旨令大學士及各部院大臣於平日眞知灼見者臚列事實秉公保奏茲據該御史奏稱全材實難貴在量能器使用當其才可奏功用違其才亦足僨事等語所奏不爲無見嗣後中外各大臣督撫於薦舉所知卽將該員才所優爲或從前見諸施行已著實效者於摺內詳細臚陳將來次第錄用卽就其所長授以職任考其事功倘所舉之員不能勝任定將原保之大臣督撫等治以所舉不實之咎中外各大臣等務當各矢公忠悉心遴選講求實際毋採虛聲用副朝廷求賢若渴量能授官至意欽此跪聆之下仰見我

奏稿卷十一

兗

皇上愛惜人才綜覈名實至意

臣

自入浙以來畱心延訪求諸踐

履之間證以事爲之實得四人焉如杭州府學生員丁丙見義必爲居心懇惻而有條理在杭州賑撫局辦理各務巨細咸宜人皆稱其善而服其敏若授以牧令之職必能拊循眾庶希蹤循良鄣縣五品銜內閣中書陳政籥才長而能斷在甯波府局襄理局務能持大體壹意奉公雖遠人亦不能撓石門縣丁憂同知銜江蘇候補知縣陳其元才長心細力持大局辦理甯波局務勤幹有爲

此兩紳者若授以繁劇之任必能有所展布遂安縣國子監學正銜貢生洪自含以利人濟物爲念敦善不怠甘貧守正秉性樸誠人共信之勸捐善舉皆有實濟年已六十不求仕進應請

賞給京銜以風末俗臣將去浙聞見既確未敢沒其所長謹以此應

詔伏乞

皇上聖鑒訓示施行謹 奏

同治三年十二月初二日內閣奉

上諭左宗棠奏敬舉人材請旨錄用一摺浙江杭州府學生員丁丙在杭州賑撫局辦理各務巨細咸宜著以知縣發往江蘇補用

奏稿卷十一

五

內閣中書陳政籥在甯波襄理局務能持大體江蘇候補知縣陳其元辦理甯波局務勤幹有爲以上二員均著以直隸州知州發往江蘇補用國子監學正銜洪自含甘貧守正勸捐善舉皆有實濟著賞加光祿寺署正銜以示鼓勵該部知道欽此

錫封伯爵敬懇 允收成命摺

同治三年十月二十七日

奏爲披瀝微誠敬懇

天恩允收成命俾得稍安愚分事竊

臣

於十月十八日准兵部火

票遞到同治三年十月十一日內閣奉

上諭閩浙總督兼署浙江巡撫左宗棠督師入浙恢復浙東各郡縣進規浙西攻克杭州省城及湖州等府縣肅清全浙并派兵截剿皖南竄賊蕩平巨股卓著勳猷茲當幼逆洪福瑱就擒殲餘孽東南軍務漸次底定自應渥加懋賞左宗棠著加恩錫封一等伯爵欽此跪誦之餘感激涕零罔知攸措伏念

臣

家世寒素耕讀相承數百年來并無貴仕

微臣

遭際

奏稿卷十一

聖

聖時仰蒙

文宗顯皇帝特達之知拔自草茅置之卿列自領偏師轉戰江西皖浙之間不數年疊蒙

皇上天恩洊擢疆圉重任寸功未建

異數頻加凡茲曠世未有之遭逢實屬夢寐難期之

恩遇茲復以江西擒獲逆種更荷

鴻施錫封伯爵自顧何能濫叨

懋賞蚤夜慚懼莫知所爲伏念殄除盜賊慎固封守皆疆

臣職分

當爲之事就使誅巢斬讓克奏膚公亦祇藉手告成功於何有況論平浙一役溫處則得閩師之力嘉湖則賴蘇軍之助卽幼逆就

擒亦江西諸將士吏民之力爲多臣幸藉助鄰封稍寬咎責豈宜濫靡好爵更荷

褒封伏懇

皇上鴻慈允收成命俾微臣得稍安愚分益勵菲忱以勉效馳驅

無虞隕越則有生之日皆戴

德之年不勝悚息待

命之至謹陳悃懇伏乞

皇太后

皇上聖鑒施行謹 奏

同治三年十一月初六日內閣奉

奏稿卷十一

三

上諭前因左宗棠督師恢復浙東郡縣規復浙西并攻克杭州省城肅清全浙派兵援剿皖南江西掃除餘孽特沛殊恩將左宗棠錫封一等伯爵以示優異茲據左宗棠奏懇陳下悃懇請收回成命并推功於諸將士各等語所奏意存退讓具見悃誠惟朝廷功懋懋賞原以該督抵浙以後削平巨寇屢克名城肅清浙江全境厥功甚偉豈能無破格恩施以獎勞勩至溫處嘉湖用兵雖得閩師蘇軍之助總由該督調度有方剋期底定洪福瓊竄擾江西亦由該督派兵援剿方能迅速戡事左宗棠實爲有功國家之臣錫爵酬庸洵可當之無愧所請懇辭伯爵之處著無庸議欽此

遵將提鎮各員出具密考摺同治三年十月二十七日

奏為遵

旨將記名提鎮各員出具切實密考仰祈

聖鑒事竊臣欽奉

寄諭軍興以來各路軍營由兵勇出身打仗得力者歷保參副等官續有勞績無可再加往往奏請以提督總兵記名簡放朝廷破格用人每逢各路統帥疆臣奏保無不立沛恩施惟提鎮係專闡大員為通省各營之表率關係極為緊要嘗有戰勝攻取極為得力而於平日一切操防各事宜閱歷太淺未免失宜迨至驕縱廢弛貽誤戎機被人參劾朝廷加以嚴譴致有用之才不獲養成大

奏稿卷十一

五

器以備干城之選殊為可惜嗣後各省督撫各路統兵大臣凡保舉記名提督總兵者須另片密註堪以勝任字樣或其人材堪造就而於提鎮大員尙難稱職不妨給與別項優獎俟其歷練較深再畀專閫重任如有實在不能勝任者亦即隨時奏參不得稍有遷就以仰副整軍經武培植將材至意欽此跪聆之下敬悉我皇上愛惜人才慎重器使至意臣維用人之方自古難責以備而行陣之選求全更難其人但使勇於赴敵而驕恣不生廉於殖財而軍民不困則制賊有其本而已亂可止未亂者不至於亂也至於方略之優長機宜之允協則求諸古昔名將蓋亦難之臣自親歷行間以來畱心考察於所部將領短長頗有所見謹據實密註

考語另具清單恭呈

御覽伏乞

皇上聖鑒謹 奏

議政王軍機大臣奉

旨畱欽此

奏稿卷十一

書



覆陳李元度被參情節摺

同治三年十月二十七日

奏爲遵

旨查明覆奏仰祈

聖鑒事竊臣於同治元年閏八月欽奉

寄諭有人奏已革臬司李元度罪重罰輕請仍按律定擬罪名一摺著左宗棠確切查明該革員罪重罰輕之處是否允當據實具奏原摺鈔給閱看欽此本年八月二十九日准兵部火票遞到議政王軍機大臣字寄八月二十一日奉

上諭前因有人奏已革臬司李元度罪重罰輕請仍按律定擬先後諭令左宗棠會國藩確切查明據實具奏茲據會國藩奏稱李

奏稿卷十一

壹

元度從該大臣最久艱苦備嘗咸豐十年守徽之役到郡不及十日侍逆大股猝至兵力未厚府城失陷奏參革職拏問本屬從嚴十一年援浙之役參案未結遽行回籍沿途飾報勝仗又不努力救杭奏參革職畱營尙爲允當且當六年春閒江西糜爛之時賴李元度力戰撫州支持危局該革員本有兼人之才惟戰陣非其所長用違其材遂至身名俱裂見在大功粗成追思昔年患難與共之人惟李元度獨抱向隅之感懇請酌量錄用等語李元度前因有人陳奏於同治元年閏八月間寄諭左宗棠查奏并將原摺鈔給閱看此次會國藩所奏各情仍著該督詳細查明李元度從前被參罪重罰輕之處是否允當迅速具奏欽此臣維會國藩原

參李元度一摺其情節以失守徽郡徑自募勇赴浙飾報克復義甯等城由江西援浙節節逗遛以致杭城失陷四者爲重如原參徽郡失守一節臣查李元度自湖南平江募勇三千於咸豐十年八月十六日甫抵徽州而李逆世賢已先四日攻陷甯國府城旋破叢山關李元度固守徽州府城三日力竭被陷會國藩馳奏其時尙未知李元度下落也旋奉

文宗恩諭李元度謀勇兼優戰功屢著此次挫衄深爲可惜人才難得著該大臣迅速查明下落具奏十月初十日復奉

上諭皖南道李元度不能堅守待援著卽革職拏問臣查李元度

失守徽州本有應得之咎會國藩因其不能固守奏參革職拏問

奏稿卷十一

姜

實爲允當惟其情尙有可原者以三千之眾倉卒分駐叢山關徽州府城當十數萬狻狷之寇勢力懸絕以不能固守責之可也若如言者謂其棄城逃避并稱其逃走在徽城未失之先未經圍城一二日之險奏劾失實洵不足折服其心此會國藩所以復有原參革職拏問本屬從嚴之奏也如原參不候審訊徑自募勇赴浙一節臣查李元度之募勇赴浙實由前浙江撫臣王有齡奏調會奉

諭旨允行既非李元度營謀亦非鄧輔綸援引李元度每以會國藩原參失實極口呼屈臣詢之鄧輔綸亦云實無其事觀杭城未陷之先瑞昌王有齡屢次檄催李元度迅速馳援并飭浙紳胡光

埔爲其籌措行糧可知此議實出於王有齡非李元度之徑自募
勇赴浙明矣曾國藩謂李元度由鄧輔綸干求入浙本是揣想之
詞并無實據詢據鄧輔綸言身在浙江係候補道員望輕資淺軍
謀一切大吏主之何敢妄有干預其言固可信也如原參由江西
援浙節節逗遛以致杭城失陷一節臣查李元度入浙時金華嚴
州兩城已陷浙東徧地賊蹤龍游本是堅城李元度頓兵其下兩
月不能速拔本圖舍龍游不攻急赴杭州之援無如前途堅城要
隘均爲賊踞進兵之路早已斷絕欲進不能觀後此臣軍入浙先
克遂安守之斷賊北路包抄乃引軍解衢州江山之圍進攻龍游
湯溪蘭谿克金華肅清浙東然後攻富陽餘杭以攻杭州驍將勁

奏稿卷十一

七

兵戴事尚在兩年以後然則李元度當時孤軍未能深入情固可
原若以杭城失陷謂由李元度逗遛所致未足折服其心曾國藩
謂其不能努力救杭事外論人每多不諒未足據也至原參李元
度自募勇赴浙飾報克復義甯等城一節查李逆秀成由皖南江
西徑竄湖北意在收羅黨夥以張逆餞逮裹脅旣眾復假道江西
皖南以歸金陵李元度由平江通城尾賊而來於賊去之後居復
城之功實近無恥臣嘗以此詰李元度稭據稱會見賊族則其未
嘗開仗可知乃當時竟騰書報捷致湖北江西均據以入奏此罪
之可議者一也自臣軍解衢州之圍復轉戰江山斷賊入江西福
建之路時李元度固守江山分八營隨臣出隊尙爲出力臣嘗倍

加獎借以期共濟時艱并因欠餉無從籌措應暫畱數營緩撤俾
餉項得資周轉乃李元度自聞會國藩劾奏落職後卽悻悻求去
心煩意亂日事紛呶維時臣軍除畱守遂安外隨同出戰者僅五
千人而李逆世賢全股及粵賊譚星等花旗粵匪人數實二十餘
萬眾寡懸絕臣許其汰撤數營挑畱數營隨同剿賊李元度固執
不從必求全撤且先將臣所指畱各營撤去以示絕無轉念明知
其時浙境淪胥無從得餉臣軍苦窘萬分乃日向偪索不給不休
臣曾飭李元度

蒙 國家何負於爾乃竟忍出此耶李元度不顧也李元度以一書生

蒙

奏稿卷十一

五

恩擢任皖南道轄境失守革職拏問復蒙

恩擢至浙江臬司革職後奉

旨交臣差委當浙事危險之時心懷怫鬱不顧大局如此此罪之
可議者二也至會國藩初次奏劾李元度謂其負會國藩負王有
齡此次代爲乞

恩又謂昔年患難與共之人惟李元度獨抱向隅之感所陳奏者
臣僚情義之私非

國家刑賞之公臣均不敢傳會具奏謹將李元度被參情節據實
直陳伏乞

皇上敕部按律定擬以昭允當理合遵

旨附驛覆奏伏祈

聖鑒訓示施行謹 奏

同治三年十一月初六日內閣奉

上諭前因御史劉慶奏參已革臬司李元度罪重罰輕請仍按律定擬當經諭令會國藩左宗棠查明具奏嗣據會國藩奏稱前因徽州失守將李元度奏參革職拏問本屬從嚴該革員前在江西力戰撫州支持危局本有兼人之才懇請酌量錄用復經諭令左宗棠查奏茲據左宗棠奏稱李元度固守徽州三日賊眾兵單力竭城陷原參謂其棄城逃避在徽城未失之先殊爲失實其募勇赴浙實係王有齡奏調并非不候審訊擅自回籍該革員援浙時

奏稿卷十一

五

浙東徧地賊蹤進兵之路中斷孤軍未能深入杭州失陷非由李元度逗遛所致惟飾報克復江西義甯等城一節查李元度由平江通城而來於賊去之後居復城之功未經開仗竟報捷書嗣後在江山隨營剿賊輒因會國藩參劾落職悻悻求去必欲將各營全撤徧索軍餉不顧大局則實咎由自取等語李元度從前本有戰功被參各節亦多不實情有可原惟在江西飾報勝仗復不顧大局撤勇索餉咎有應得著該部分別情罪秉公按律定擬以昭平允欽此

覆陳被參道員鄧輔綸巡禦不力請

旨革職片

同治三年十月二十七日

再臣欽奉

寄諭有人奏浙江試用道鄧輔綸前在江西管帶平江營勇丁所至騷擾冒餉致富嗣捐道員分發到浙王有齡深加委任杭城失陷該員擁眾潛逃刻下聞尙在江楚鑽營帶勇希圖保舉等語該員於杭城失陷時本有應得之罪亟應從嚴懲辦以肅軍律著左宗棠查明據實參奏按律嚴懲毋稍徇縱原片著鈔給閱看欽此伏查鄧輔綸由同知捐升道員咸豐十年七月分發來浙十一年九月杭城被圍前撫臣王有齡委其隨同巡城及分查保甲等事十一月二十八日杭城失陷時鄧輔綸在慶春門城上巡查而鳳

奏稿卷十一

十一

山侯潮等門守兵紛紛譁潰傳言清波望江兩門已陷矣鄧輔綸正圖抵禦適賊眾蜂擁而至勢不能支鄧輔綸帶傷後投入城河遇難民搭救得生隨至上海同治元年三月隻身赴衢投到嗣因其祖母年逾九十請假省視臣當飭其回籍并無擁眾潛逃及在江楚鑽營帶勇情事該員到省僅只年餘資望甚淺王有齡僅委巡城及分查保甲等事并未深加委任至從前在江西帶勇所至騷擾冒餉致富一節訊查毫無實據該員係前江西臬司鄧仁堃之子人頗馴謹家亦小康其帶勇時并無劣迹至杭城被陷鄧輔綸係試用人員自未便與地方印委各官一體治罪惟巡禦不力咎亦難辭應請

旨將浙江試用道鄧輔綸卽行革職以示情法之平理合附片具奏伏乞

聖鑒訓示施行謹 奏

同治三年十一月初六日內閣奉

上諭前因升任御史梅啟照奏參浙江試用道鄧輔綸前在江西管帶勇丁騷擾冒餉嗣捐道員分發到浙杭城失陷擁眾潛逃復在江楚諸軍鑽營帶勇希圖保舉等語當經諭令左宗棠查明參辦茲據左宗棠奏稱鄧輔綸由同知捐升道員分發浙江咸豐十一年九月杭城被圍經王有齡委令巡城迨十一月間杭州省城失陷該員帶傷投入城河遇救得生於同治元年三月請假回籍

奏稿卷十一

空

并無擁眾潛逃及在江楚鑽營帶勇情事其從前在江西帶勇騷擾冒餉一節亦查無實據惟省城被陷巡禦不力咎亦難辭請旨革職等語浙江試用道鄧輔綸著卽行革職欽此

交卸撫篆赴閩督師勦賊摺

同治三年十月二十七日

奏爲

微臣

交卸撫篆起程赴閩督師勦賊所調援閩各軍見在均

可陸續馳抵閩境恭摺馳陳仰祈

聖鑒事竊臣於本月二十日准兵部遞到議政王軍機大臣字寄

十月十三日奉

上諭左宗棠奏賊竄閩境請派兵援勦覽奏均悉龍巖與粵東毗連各處俱爲賊踞閩省軍情萬分喫緊著左宗棠催令派出各軍并親督官軍速籌進剿欽此旋得閩省稟報漳州仍爲賊踞李逆世賢踞漳州汪逆海洋踞濯田丁逆大洋踞武平賊數頗眾雲霄旣失漳平復急閩中人心益形震動臣自應迅速馳往相機勦辦

奏稿卷十一

三

所調援閩各軍約分三路劉典率八千餘人由江西撫建入汀州爲西路本月十四日已抵撫州前隊已行抵建昌計此時已入閩疆矣記名臬司王德榜所部二千五百人亦由此路繼進黃少春劉明珍率所部馬步四千六百人由衢州江山出浦城爲中路臣原檄其趨邵武續因汀州有備邵武無虞改調赴建甯以趨延平據報十四日已抵浦城矣高連陞率所部四千并浙江補用知府魏光邴所部五百人由杭州赴甯波雇坐輪船直趨福州出興泉爲東路據報上海輪船十九日可雇到二十二日全軍啟行計兩三日可抵福州臣於二十四日遵

旨將浙江巡撫關防兩浙鹽政印信

王命旂牌委臣標中軍參將李耀光杭州府知府薛時雨齎交藩
司蔣益澧護理定於二十八日帶親兵及各營取道衢州浦城以
出中路閩浙總糧臺仍駐衢州其浦城建甯均設轉運局一切進
止機宜容當隨時馳奏所有微臣交卸起程日期理合由驛馳奏
伏乞

皇上聖鑒訓示謹 奏

議政王軍機大臣奉

旨另有旨欽此

奏稿卷十一

壹

援閩軍餉由浙籌解片

同治三年十月二十七日

再浙省援閩各軍統計二萬三千餘人每月約需餉銀十四萬兩此時漳州龍巖及汀州各屬均被賊擾閩省軍需萬分支絀浙省派去援師所需餉項自應由浙協濟且查從前慶端辦理援浙軍務半年用閩餉九十九萬五千餘兩耆齡辦理援浙軍務半年用閩餉九十九萬八千餘兩臣接任後從上年四月起截至本年九月止計一年零五箇月又用閩餉一百零八萬二千兩茲以浙餉仍濟浙師稍紓鄰困於義本爲允協臣赴閩後應請

旨責成護撫臣蔣益澧署藩司楊昌濬每月籌撥餉銀十四萬兩解交衢州總糧臺轉解軍前以資應用浙省地方均係新復籌餉

奏稿卷十一

齋

甚難見既奏明每月撥解援閩各軍餉銀十四萬兩嗣後別省協款卽請

敕部暫免派撥理合附片具奏伏乞

聖鑒施行謹 奏

議政王軍機大臣奉

旨另有旨欽此

敬陳浙江應辦善後事宜片

同治三年十月二十七日

再浙江初復百度更新臣與僚屬竭力經營尙祇甫有端緒如除匪安良剔除痼弊修復水利諸大端關係尤重臣智慮短淺又兼時日迫促未克稍究厥施實維心疚如嘉湖槍匪一節爲奸盜之源風俗之害業經蔣益澧節次拏辦斬除著名劇匪百餘名編立船埠稽查保甲勒繳船械邇來浙境漸已斂戢風聞徒黨之逃入上海者尙多臣會函請李鴻章密速捕治以淨根株未知如何辦理蘇境未清則亦浙境之患也至台州負山面海風氣素稱悍戾土豪動輒結黨相攻玩視官長及今不治必爲後患臣已檄委甯浙補用道銜知府劉璈署理台州府知府其台州協副將一缺以

奏稿卷一

五

甯浙副將谷香山署理各帶所部勇丁赴任冀其懲除豪惡俾愚懦得以安生然亦非旦夕可期之效至杭屬及甯紹台溫濱海之區海盜時有出沒水師直同虛設船礮全無欲治洋盜以固海防必造礮船以資軍用輪船紅單兩式均不可廢仿造雇駕兩議非錢不行一時籌措無從不得不緩期以待此治匪之事尙須妥爲經理者也杭嘉湖三屬錢漕之重實浙中數百年民瘼攸關見雖擬議籌辦大概情形陳奏然非守令實心經理難期盡善而垂久遠至南北新關權稅之害關係杭郡一方民瘼見甫議劃釐抵稅未卜能否邀

恩其金衢嚴台四郡徵收錢糧章程尙未及籌辦此剔弊之事尙

須妥爲經理者也浙江全轄土田近山者瘠近水者腴民田賦重更賴蠶桑爲生理蠶桑之利惟浙西爲最饒民之治桑其栽培灌溉與治水田無異故自古治浙有聲者莫不以水利爲重也海塘關係吳越兩省農田寇亂以來石工坍塌過甚欲及時修復約略估計非百餘萬兩不可此時公私蕩盡捐墊俱窮臣前已奏明先備辦土塘暫禦鹹潮計亦非得銀二十萬兩不可其工概由紳捐紳辦官不與聞見在雖經興工而亂後人稀料賤工貴一時尙難迅期蒞事至杭州西湖爲仁和海甯水利所關餘杭南湖爲仁錢水利所關省城中河爲民商炊汲舟楫之利今雖中河修濬完工南湖草草畢事而西湖則淤墊已高葑長水枯未遑議濬此修復

奏稿卷十一

奏

之事尙須妥籌經理者也臣已交卸撫篆料理起程而每念此邦疾苦情形殊深耿耿幸護撫臣蔣益澧與臣共事已久於整軍治民各事極意講求署布政使楊昌濬與臣相處多年信心有素必能補臣缺漏仰答

恩知臣已將應辦未辦各事交其妥爲籌畫惟是爲治之道興利不如除弊任法不如用人兩臣敷歷未久於部中一切文法則例均未深悉若遽以此相繩正恐力有未逮是則區區之愚不敢不盡者耳謹附片具奏伏乞

皇上聖鑒謹 奏

議政王軍機大臣奉

旨另有旨欽此

奏稿卷十一

三

議政王軍機大臣字寄同治三年十一月初六日奉

上諭左宗棠奏交卸撫篆赴閩督師剿賊并瀝陳浙省應辦善後事宜徐宗翰奏官軍分路剿賊情形并請將陣亡臬司張運蘭等優卹各摺片覽奏均悉福建官軍分路剿賊屢獲勝仗惟李世賢汪海洋丁太洋等逆尙踞漳州濯田武平等處賊數頗眾左宗棠見飭劉典王德榜由西路進黃少春劉明珍由中路進高連陞等航海直趨福州出興泉爲東路之師而自率親兵由衢州浦城赴閩相機調度於地勢軍情籌畫均中竅要卽著督率各軍迅速入閩實力剿賊盡殄賊氛以副委任其閩省之曾玉明康國器等軍及江西赴援之宋國永婁雲慶等軍仍著左宗棠徐宗翰分別檄

奏稿卷十一

十一

催會合夾擊期收聚殲之效至援閩軍餉業由左宗棠飭令蔣益澧楊昌濬等每月籌解銀十四萬兩源源接濟卽著蔣益澧督飭楊昌濬妥爲籌畫按月如數撥解以利軍行徐宗翰所請敕部酌撥鄰餉一節卽可毋庸再議浙江初復百度維新左宗棠於除匪安良剔除痼弊修復水利諸大端竭慮殫心漸有端緒此時交卸起程蔣益澧護理撫篆卽屬責無旁貸所有海塘工程農田水利及濱海各郡整飭水師台州所屬懲除豪惡各事宜并著與楊昌濬審度時勢次第籌辦馬新貽到任後并著將以上應辦各事宜咨商左宗棠妥籌辦理務出萬全至嘉湖槍匪爲蘇浙兩省奸盜之源風俗之害經蔣益澧節次擒斬劇匪編立船埠稽查保甲勒

繳器械浙境漸已斂戢而徒黨之投入上海者尙多著李鴻章督飭員弁密速捕治以淨根株不得敷衍了事致成隱憂左宗棠所稱爲治之道興利不如去弊任法不如用人蔣益澧等數歷未久請勿繩以文法等語部中文法皆係歷久奉行舊章自當遵守至地方瘡痍未起一切章程有必應變通者疆臣果能剴切敷陳朝廷未嘗不特予俞允蔣益澧等惟當勤求民瘼力矢公忠遇有應行事宜將實在情形詳晰具奏朝廷必能斟酌重輕權衡至當毋以文法相繩鯁鯁過慮也將此由六百里諭知左宗棠李鴻章徐宗幹馬新貽并傳諭蔣益澧知之欽此

督師行抵浦城見籌勦辦情形摺

同治三年十一月十八日

奏爲

微臣

督師入閩行抵浦城見籌勦辦情形恭摺奏祈

聖鑒事竊

臣

於十月二十四日將兼署撫篆交卸後卽於二十八

日自杭起程十一月十六日行抵福建浦城沿途疊據閩省文武

稟報漳州龍巖南靖永定平和雲霄各城賊尙屯踞如故署陸路

提督林文察十月十二日進勦漳郡踞逆副將惠壽營盤先陷林

文察退紮玉洲十四日出隊響水橋獲一小勝十一月初三日漳

郡踞逆出犯萬松關瑞香亭陸路各營并分股直撲鎮內水營林

文察督陸軍接仗因後路被賊抄襲兵勇敗潰林文察中槍陣亡

其瑞香亭萬松關陸營同時失陷方事急時曾玉明督水軍橫轟

奏稿卷十一

十一

賊陣死傷亦多旋退三汊河并收集副將惠壽遊擊許忠標等潰

勇暫紮江東橋以固泉州門戶

臣

查閩省惟康國器一軍尙稱整

練此外各軍均係零星雜湊難期得力林文察前帶本籍臺灣勇

丁尙稱能戰此次內渡倉卒調集兵將兩不相習復濫收隨營文

武兵勇多人冗雜尤甚

臣

前檄令力保泉廈并未敢責以規復漳

州旋聞其已進萬松關距漳城僅二十餘里復檄其深溝固壘勿

浪戰求勝俟浙軍到後協力并規乃爲穩著不料其急於趣戰致

有此失也幸高連陞一軍已由福州前進初七日已抵泉州據函

稱逆賊李世賢自初三日得逞後土匪從亂如歸已蔓延萬松關

石碼北溪等處泉廈岌岌林文察此次之挫土匪面擦煙煤潛襲

後路卽曾玉明亦稱土匪敵官軍出隊卽將營帳搶劫一空然則漳州民心之不足恃已可概見矣高連陞擬率所部急趨同安以保泉廈尙未知能否到在賊前其記名提督黃少春及擬保總兵劉明珍所部臣本飭其暫駐延平聽候調遣旋准撫臣來咨已徑調赴省旋調赴長泰據黃少春稟擬於初八日前進此東路進兵情形也其龍巖州踞逆散布長汀連城甯洋各界時出窺伺候選道張恆祥率張運蘭舊部一擊挫之見尙無動靜康國器由永安進紫雁石在龍巖城東二十餘里臣咨劉典先將汀州連城甯洋一帶踞匪肅清以攻龍巖之北復調新署福建臬司王德榜由瑞金馳赴汀州擬俟其到後休息數日出汀州南趨上杭以攻龍巖

奏稿卷十一

三

之西計驅逆賊歸併一處嚴遏北竄彼此聯絡而後兵力乃敷分佈免爲賊所牽綴見據劉典函報已抵建甯縣其前隊已抵甯化王德榜一軍由江西長甯取道雩都瑞金入閩計此時亦可馳抵汀界此西路進兵情形也其中路以延平爲最要蓋延平距省會四百里一水可通旣可據上游以杜窺伺之萌復可策應龍漳諸軍爲犄角之計臣原擬令黃少春暫駐此地待臣入閩後調遣今旣調赴省城復調赴東路則中路空虛臣已飭隨行四營先由建甯馳赴延平臣於拜摺後卽率親兵續進俟抵延平後察看情形續報至前奉

諭旨鮑超所部婁雲慶等由臣調遣此時尙無入閩消息也除林

文察失利陣亡所部各營死傷潰逃實在情形容會同福建巡撫
臣徐宗幹查明分別請

卹參辦外理合恭摺由驛馳奏伏乞

皇上聖鑒訓示施行謹 奏

議政王軍機大臣奉

旨另有旨欽此

奏稿卷十一

三

請將署浙江臬司劉典開缺幫辦軍務并遴員接署臬司運司篆

務片

同治三年十一月十八日

再臣於十一月初三日嚴州軍次欽奉同治三年十月二十三日

寄諭劉典見由左宗棠檄赴汀州剿賊軍務喫緊之時未能遽准

終養其浙江臬司本任即毋庸先行開缺見署臬篆之林聰彝如

果閱歷尚淺於此缺不甚相宜即著左宗棠另派賢員接署或於

鄰近省分另有所知人才亦可酌保數員候旨簡用李榕見在皖

一臣一時未能履任業准其開缺浙江運司已簡放楊昌濬所

遺浙臣糧道一缺并令周開錫補授矣等因欽此臣查布政使銜

署浙江按察使劉典自上年聞訃丁憂回籍即請開缺終制嗣以

奏稿卷十一

三

逆賊竄入江境臣檄其由湘募勇赴江援剿旋奉

旨幫辦江皖軍務見在江境肅清閩省被賊竄擾臣檄其由建昌

取道汀連相機進剿該臬司以墨經從戎雖義無可諉而服官從

政終覺心有未安再四呈請開缺俟閩省軍務完竣回籍終制臣

察其情詞極爲懇切是以不得不代爲陳請合無仰懇

天恩俯准開劉典署浙江按察使缺仍以二品頂帶幫辦福建軍

務俾臣得收指臂之助至浙江臬司一缺臣於外省人材未能深

知就浙江而論惟新授鹽運使楊昌濬廉慎勤懇才長品卓爲臣

所深信實堪接署惟見以運司署理藩司未便再令兼權臬篆而

運司一缺又非熟悉浙省鹽務情形者驟難期其經理咸宜楊昌

濬署任政事殷繁勢難兼顧臣再四思維惟擬保道銜浙江候補知府高卿培操履篤實才具明晰於籌餉諸事最肯盡心本年浙西改行票鹽章程臣令其悉心參酌皆能妥協若以之署理運司必能稱職亦浙江官場公論也茲蒙

垂詢謹據實附陳伏候

皇上聖鑒訓示施行謹 奏

議政王軍機大臣奉

旨另有旨欽此

議政王軍機大臣字寄同治三年十二月初一日奉

上諭左宗棠奏督師入閩行抵浦城見籌剿辦情形一摺閩省漳
州各城均爲賊踞署提督林文察倉猝進剿致後路被賊抄襲兵
勇敗潰林文察中槍陣亡賊勢猖獗泉廈危急高連陞一軍已抵
泉州著左宗棠徐宗幹飛檄該署提督迅率所部急趨同安務期
到在賊前扼要防剿以保泉廈門戶并飭調赴長泰之黃少春等
軍合力兜剿穩重進攻毋令賊蹤再形滋蔓劉典前隊已抵甯化
王德榜一軍由江西取道入閩計已馳抵汀界著卽照左宗棠所
籌飛飭劉典所部先將汀州連城甯洋一帶踞匪肅清進攻龍巖
之北王德榜所部由汀州南趨上杭進攻龍巖之西總期聯絡遏

奏稿卷十一

五

截妥籌分布將龍巖踞逆悉數聚殲以免復行旁竄左宗棠因中
路空虛先撥隨行四營馳赴延平卽率親兵續進著俟抵延平後
居中策應分籌遏剿卽將辦理情形迅速奏聞龍漳一帶賊勢鴟
張各軍分路環攻能將該踞逆在閩境就地聚殲自屬上策惟恐
該匪被剿窮蹙鋌而走險則回竄江西旁窺粵境或潛蹤入海以
致滋蔓難圖均在意計之中毛鴻賓郭嵩燾所派粵軍前已越境
收復武平等城著仍懍遵前旨迅飭方耀等軍跟蹤追剿會合江
西閩浙之軍進規漳郡殄除竄匪其閩粵濱海地方并著左宗棠
徐宗幹毛鴻賓郭嵩燾撥兵嚴防倘任令匪蹤入海剽掠必惟該
督等是問江西援閩之婁雲慶等軍見在行抵何處著沈葆楨迅

催前進并由左宗棠徐宗幹探明催提以厚兵力沈葆楨務當嚴飭江防諸軍嚴扼要隘以杜匪蹤回竄毋稍疎忽左宗棠另片奏請將署臬司開缺幫辦軍務等語本日已明降諭旨將劉典開缺仍以二品頂帶幫辦福建軍務并將楊昌濬補授浙江臬司高卿培補授浙江鹽運使矣聞浙諸軍勦匪事宜卽著左宗棠隨時與劉典籌商辦理迅將逆氛埽盪疆圉肅清以副委任林文察陣亡詳細情形并著左宗棠等查明具奏再降諭旨將此由六百里各諭令知之欽此

再陳懇辭伯爵摺同治三年十月初五日

奏爲

聖恩愈厚臣志難安仍懇

允收成命事竊臣於十一月十八日浦城行營准兵部火票遞回原摺承准議政王軍機大臣字寄同治三年十一月初六日內閣奉

上諭前因左宗棠督師恢復浙東郡縣規復浙西并攻克杭州省城肅清全浙派兵援剿皖南江西掃除餘孽特沛殊恩將左宗棠錫封一等伯爵以示優異茲據左宗棠奏懇陳下悃懇請收回成命并推功於諸將士各等語所奏意存退讓具見悃誠惟朝廷功

奏稿卷十一

七

懋懋賞原以該督抵浙以後削平巨寇肅清浙江全境厥功甚偉豈能無破格恩施以獎勞勩至溫處嘉湖用兵雖得閩師蘇軍之助總由該督調度有方剋期底定洪福瑱竄擾江西亦由該督派兵援剿方能迅速戴事左宗棠實爲有功國家之臣錫爵庸庸洵可當之無愧所請懇辭伯爵之處著無庸議欽此跪聆之下悚仄益深伏念軍興以來在事諸臣宣勞最久微臣效力最遲諸臣多由薦舉得官微臣於疑謗交集之時蒙

文宗顯皇帝特旨垂詢而起其受

兩朝恩知之隆愈深其圖報之心應愈切頻年馳驅戎馬皆職分所當爲既疊蒙

殊恩畀以疆圻重任復承

溫旨異數頻叨在

朝廷已極懋賞之施在

微臣

應知止足之分若再濫膺顯爵愧歎

奚如此

臣

志所難安者一也逆賊李世賢汪海洋巨股竄入閩疆

郡縣數被襲陷

臣

兼圻責重未能先事預防茲當督師進征亦惟

以忠義共相勸勉庶幾殲羣醜以播

天威拯邊氓而固封守若先有忝竊之譏更難責將士以用命之

效此

臣

志所難安者二也凡茲陳懇實出愚誠不敢飾讓以鳴高

亦不敢矯情以速謗應仍懇

皇上天恩允收成命俾

微臣

得稍循涯分勉副馳驅不勝悚息待

奏稿卷十一

夫

命之至伏乞

聖鑒施行謹

奏

議政王軍機大臣奉

旨知道了母須固辭欽此

攻守龍巖漳平壘勝及由連城進剿先勝後挫情形摺

同治三年十二月初

五日會福建巡撫徐宗幹銜

奏爲官軍偪攻龍巖扼守漳平壘獲勝仗暨由連城進剿先勝後挫見籌剿辦情形恭摺馳奏仰祈

聖鑒事竊臣宗棠於十一月十六日馳抵浦城拜摺後卽督師前

進二十七日行抵延平據各路稟報李逆世賢仍踞漳州汪逆海洋踞長汀連城上杭三縣交界之南陽鄉及新泉一帶自永定上杭龍巖以至漳州縱橫數百里一片賊氛康國器由永安雁石進剿龍巖先飭知府康熊飛率昭武彰武飛虎揭陽各營前進飭福建水師遊擊陳允彩守備熊應烈分扼朝天嶺通朗車之路以杜

奏稿卷十一

堯

逆賊抄襲十二月初二日康熊飛等進紮距龍巖州城八里之鐵石洋賊乘營壘未就突出大股來犯各軍力戰卻之初五日出隊距城三里地方擊斃逆賊多名將城外賊巢焚燬初七日康熊飛羅洪彪林福喜林本各率所部進薄東門賊伏不出相持至午突出悍黨二千餘人官軍奮勇接戰斃賊數十名賊勢稍卻南門北門又各出賊數千翼抄官軍之後林本率揭陽營林福喜率飛虎軍馳往分擊槍斃賊匪無算三路之賊皆敗退附城壘邊官軍正擬乘勢取壘適北門潛出悍賊千餘由小路徑撲鐵石洋官軍營壘彰武軍營官羅洪彪督哨弁譚順龍許榮貴等竭力堵禦殺賊二十餘名康熊飛等馳回夾擊鏖戰兩時賊始敗退計是役共斃

騎馬賊目十餘名悍賊數百名是夜康熊飛林本激勵各勇分路潛攻城外各賊壘破之又殺賊數百名十一日龍巖各路援賊麇集分撲飛虎揭陽兩軍營壘官軍憑壘以待康熊飛以羅洪彪彰武軍扼守蔣武小路自率昭武軍往援持至未刻見賊勢將退康熊飛飭各營奮擊斃騎馬賊目多名賊敗走二十三等日龍巖城賊又出悍黨萬餘圍撲鐵石洋營壘往來猛攻十餘次均經官軍奮力擊退計兩日共斃賊千餘名十六日龍巖之賊又以大股突出東門另股由馬巖嶺僻徑竄入下老地方圖夾攻鐵石洋營壘時康國器已馳抵雁石當飭各勇分伏山谷於雁石隘口虛設旂幟該逆恐雁石官軍截其歸路旋即退去當康等之偪攻

奏稿卷十一

全

龍巖也該逆見官軍深入喉逆首丁太洋由永定出漳平以襲官軍後路漳平永福里土匪導由小路以撲城垣朝天嶺守將陳允彩所部未築營壘遇大股賊至紛紛潰散熊應烈勢孤且戰且退比至嶺腳收隊退保漳平縣城十一日賊遂偪撲城垣適臣宗棠所調遊擊賴長甫自甯洋馳至與熊應烈登陴固守偃旂息鼓誘之伏壯士城外以待賊意其無備也蜂擁而至衝過浮橋城上槍礮齊發立斃悍賊十餘名伏兵突起左右蹙之該逆紛紛潰走落水及踐踏死者不計其數賴長熊應烈見賊勢已挫復率勇開城出擊又殺賊百餘名該逆退至距城二十里洪橋屯踞是夜賴長等挑勇丁數十名潛至洪橋將賊館焚燬羣賊驚擾達旦十二日

仍向永福里朝天嶺退去此康國器一軍偪攻龍巖及扼守漳平
壘獲勝仗之實在情形也其劉典一軍由連城進駐朋口適接康
國器函報漳平被圍請撥兵援勦劉典以汪逆海洋見踞南陽其
黨分布舊縣新泉一帶若改趨漳平則連城清流甯化皆屬可虞
當商撥護汀漳龍道趙均所部馳赴漳平自率各營進紮楊家坊
以攻汪逆新泉南陽老巢使汪逆與龍巖踞逆首尾不能相顧翼
勦辦易於得手十七日分勦新泉下車上下羅等處賊卡賊館破
之殺賊六七百名生擒七十餘名十九日飭道員李耀南副將張
福齋參將劉大謨總兵楊芳桂馬步各營分三路進勦馬洋洞將
賊壘攻破正擬傳令收隊築壘劉大謨等乃恃勇輕進甫行數里

奏稿卷十一

十一

汪逆海洋嚇各路悍逆分路包抄各營面面受敵劉大謨及營官
鍾九如各受重傷副將盧華勝副將銜參將劉敬廷血戰陣亡劉
典急率總兵黃有功參將伍正德知縣陳鴻藻帶隊馳援行甫半
里卽與賊遇正接戰間該逆另股已抄襲後路遊擊郭立本力戰
死之賊遂乘勢徑撲楊家坊行營劉典與黃有功陳鴻藻折回援
救而壘中已火起矣同知李光瑩知縣夏世楷州判姜景焜附生
謝封擬保訓導龍鴻賓從九品蕭子麒監生沈超文章黎斗城等
均守壘遇害其道員李耀南副將張福齋由小路前進者亦被賊
圍偪督所部奮擊突圍而出損失獨少二十日劉典收集各營退
保連城此劉典一軍由連城遡先勝後挫之實在情形也竊維

汪逆因康國器一軍速偪龍巖希圖圍攻漳平以抄官軍後路劉典抵連城後擬先攻南陽汪逆老巢原圖攻所必救以分賊勢而解漳平之圍布置本屬周妥因山徑紛歧客軍初至未及審眎戰地劉大謨違令輕進遂至爲賊所乘見王德榜王開琳兩軍計期可抵汀州漳平擊賊解圍鐵石洋各營以固守卻賊賴長熊應烈已經康國器調赴雁石護汀漳龍道趙均已率所部嚴扼漳平此路兵力漸厚臣飭劉典固守連城所部李耀南張福齋兩軍銳氣未減可與王德榜王開琳兩軍聯絡以圖汪逆必將汪逆巨股掃除然後可合圖龍巖也其高連陞一軍抵泉州後聞同安土匪將乘機蠢動圖應漳城踞逆高連陞急馳而前初十日抵同安人心

奏稿卷十一

三

乃定見已由同安進紮距漳城二十餘里之萬松關瑞香亭一帶扼漳州東路黃少春一軍亦飭由泉州同安赴長泰進紮漳州東北一路賊固匿不出將以堅城綴我伺間以逞漳州城外數十里地勢平行彌望蔗田難以進攻自林文察敗歿後附近村莊多被賊脅必先將村莊撫定乃免內患見檄高連陞黃少春勿攻城勿浪戰深溝固壘相機圖之能誘賊撲壘反客爲主痛剿數次然後機有可乘長泰一路與漳平連界能就近聯絡庶可防紛竄而衛泉廈紓漳軍後顧之憂臣等會商辦賊之法必須取遠勢漸偪漸進驅各處股匪歸併一處而後合力蹙之庶完善之區得以保全而兵力亦敷分布未敢急目前之效致誤大局也署浙江按察使

劉典此次先勝後挫自請議處咎有應得惟念該員因救援漳平龍巖官軍冒險急進情有可原應懇

天恩免其置議以觀後效副將銜參將劉大謨管帶右路各營違令輕進致有貽誤雖曾受重傷究難辭咎福建金門水師遊擊陳允彩經康國器飭令嚴扼朝天嶺遇賊卽潰實屬庸懦無能均應請

旨革職擊問閩浙儘先補用副將盧華勝副將銜浙江儘先補用參將劉敬廷遊擊郭立本卽選同知李光瑩候選知縣夏世楷儘先選用州判姜景焜附生謝封擬保訓導附生龍鴻賓卽選從九品蕭子麒監生沈超文童黎斗城均請

奏稿卷十一

三

旨敕部照陣亡例議卹擬保副將銜參將花翎遊擊賴長力守漳平擊退巨股逆匪當危險之際從容鎮定膽力兼優應請

旨賞給勇號以示優異理合恭摺由驛馳奏伏乞

皇上聖鑒訓示施行再此摺係_臣宗棠主稿合併陳明謹 奏
同治三年十二月二十一日內閣奉

上諭左宗棠等奏官軍進攻龍巖扼守漳平疊獲勝仗暨由連城進剿先勝後挫情形一摺粵逆擾竄福建自永定上杭龍巖以至漳州賊氛縱橫數百里經左宗棠調派康國器一軍進剿龍巖擊斃賊匪多名焚其城外賊壘該逆由東南北三門分路出撲并疊次出悍賊萬餘圍撲官軍鐵石洋營壘均經擊退連日共斃賊千

餘名該逆因官軍深入喉另股分擾漳平圖襲後路朝天嶺守將陳允彩敗潰熊應烈退漳城適遊擊賴長率軍馳至與熊應烈登陣固守伏兵誘之該逆蜂擁而至衝過浮橋城上槍礮齊發左右伏兵突起逆匪紛紛敗潰落水及踐死者不計其數乘勝逐北并將該匪洪橋賊館焚燬賊向朝天嶺退去劉典一軍由連城進攻汪逆新橋南陽老巢連破下車上下羅馬洋洞賊卡賊壘參將劉大謨恃勇輕進被賊包抄劉典急率隊馳援復被另股抄襲後路副將盧華勝等先後力戰陣亡仍著左宗棠徐宗幹部勒諸軍迅將汪逆巨股殄除次第克復龍巖漳州等城毋任久踞此次劉典進兵先勝後挫咎有應得惟該員因救援漳平龍巖官軍冒險急

奏稿卷十一

齒

進情有可原著加恩免其置議參將劉大謨違令輕進致有貽誤實難辭咎福建金門水師遊擊陳允彩扼守朝天嶺遇賊卽潰庸懦無能均著卽行革職擊問閩浙儘先補用副將盧華勝副將銜浙江儘先補用參將劉敬廷遊擊郭立本卽選同知李光瑩候補知縣夏世楷儘先選用州判姜景焜生員謝封擬保訓導龍鴻寶卽選從九品蕭子麒監生沈超文童黎斗城均著交部照陣亡例議卹以慰忠魂參將賴長此次力守漳平擊退巨股逆匪實屬膽力兼優著賞給著勇巴圖魯名號以示鼓勵欽此

議政王軍機大臣字寄同治二年十二月二十一日奉

上諭左宗棠等奏官軍偪攻龍巖扼守漳平獲勝暨由連城進剿先勝後挫見籌剿辦情形毛鴻賓等奏越境赴援詔安乘勝進偪雲霄見仍防剿兼籌并請調馮子材督辦東江軍務吳全美請假回籍各摺片覽奏均悉本日已明降諭旨照左宗棠等所請分別獎懲矣逆首李世賢仍踞漳州汪海洋踞長汀連城上杭交界之南陽鄉劉典一軍新挫逆勢猖獗該督所籌辦賊之法先取遠勢漸偪漸近驅令歸併一處然後合力蹙之實爲切中機宜見在王開琳王德榜兩軍計可抵汀賴長等軍經康國器調赴雁石趙均所部亦已嚴扼漳平北路兵力較厚著左宗棠徐宗幹妥籌布置

奏稿卷十一

十一

務期聯絡聲勢先將汪逆巨股殄除以期進偪龍巖劉典退保連城之軍尤當穩慎進取勿再疏失漳州城外地勢平衍自林文察敗歿後附近村莊多爲賊脅高連陞一軍見紮萬松關瑞香亭一帶以扼漳州東路黃少春一軍馳赴長泰扼漳州東北一路該逆堅匿不出伺隙圖逞乃其慣技左宗棠務令各軍深溝固壘先爲不可勝以待賊之可勝其漳軍後路及泉廈門戶須節節布置嚴密毋致爲賊所乘閩省賊勢甚重該處兵力恐有不敷江南見已無警著李鴻章於蘇省防兵內酌量抽撥礮隊赴閩歸左宗棠調遣李鴻章所部除劉銘傳一軍已赴豫省外此外該省得力兵將左宗棠如須添調一面檄調一面奏聞以資協助毛鴻賓等奏官

軍赴援詔安乘勝進逼雲霄惟龍連汀杭一帶界連潮州不能不防其回竄該督撫見飭李福泰往來嘉應惠州之間相機調度方耀一軍由武平進紮上杭之蚡蛇渡先顧上杭進規永定鄭紹忠一軍駐紮上杭之峰市與翟國彥方耀等聯絡策應所籌尙安賊謀甚狡伺隙卽逞著卽飭令李福泰督飭諸軍相機會合進剿務先嚴防本境門戶毋得少有疏虞賊如不得逞志於閩必將全力趨粵馮子材前經請假回籍修墓會令其假滿後赴廣西提督本任該員久歷戎行深明韜略廣東形勢岌岌自應保衛桑梓馮子材著暫畱廣東督辦東江軍務并毋庸俟假滿卽馳赴大埔饒平之交擇要駐紮堵剿漳州大股巨逆李福泰俟馮子材到防後再

奏稿卷十一

全

行回省吳全美統帶師船回粵著賞假三箇月回籍修墓福建軍務緊要著毛鴻賓傳知該提督假滿後卽馳赴福建水師提督新任毋庸來京陛見毛鴻賓等片內所稱據總稅務司赫德面稱適見新聞紙言侍逆李世賢見踞漳州句結洋人幫同襲取泉州進襲福州約將海口通商地面讓給洋人等語原不足據以爲信而各處流氓希圖句結網利亦事所或有請敕福建防範并敕總理衙門照會各國駐京公使轉飭駐紮閩省洋官及領事官等約束商民各等情本日已諭令總理各國事務王大臣妥籌辦理著英桂徐宗幹嚴飭所屬妥爲稽查如有外國流氓句結生事拏交各國領事官從嚴懲辦泉州等處防務并著飭令地方文武認真辦

理勿稍大意欽此

奏稿卷十一

全

查參畏賊玩法將弁片

同治三年十
二月初五日

再漳州之失變起倉卒鎮道同時殉難城守都司汪普恭未能救
援續入林文察營內亦未出力林文察十月十二日十一月初三
日兩挫已革副將惠壽及參將顧飛熊遊擊許忠標賴正修守備
許如龍等身爲營官或遇賊先潰或不力圖救援以致孤軍陷歿
該將等畏賊玩法均堪痛恨除咨高連陞黃少春等確查當日情
形及此外應行查辦各弁據實覆知分別擬辦外應請先將汪普
恭惠壽許忠標賴正修許如龍均革職拏問以肅軍令謹附片請
旨伏乞

聖鑒訓示施行謹 奏

奏稿卷十一

全

議政王軍機大臣奉

旨汪普恭等均著革職拏問按律懲辦欽此

請 敕漳州鎮總兵李成謀速赴本任片

同治三年十
二月初五日

再記名提督福建漳州鎮總兵李成謀

簡放實缺後因在湖北軍營未經履任見聞湖北軍務肅清有期而閩省賊氛正熾水陸營務廢弛早在

聖明洞鑒之中臣甫經入閩擬卽次第整理而將材難得空費躊

躇李成謀久歷戎行樸實勇敢自其從軍時臣卽識之前接其函亦欲速赴浙閩自效合無仰懇

天恩敕下湖廣督臣轉飭李成謀速赴漳州鎮總兵本任并酌挑所部水師得力弁丁隨帶赴閩俾得稍資臂助理合附片具奏伏乞

奏稿卷十一

九

皇上聖鑒施行謹 奏

議政王軍機大臣奉

旨李成謀已諭知官文飭其速赴本任并令酌挑所部得力弁丁隨帶赴閩矣欽此

獲辦行劫洋盜摺同治三年十二月初十日會銜

奏爲獲辦行劫洋盜恭摺奏報仰祈

聖鑒事竊前據署海壇左營守備陳曜魁督帶舟師在吉鈞洋面
巡見盜船二隻當卽圍捕匪船駛至可門澳礁島水登岸逃逸適
平潭福清廳巡役踵至協同擒獲匪犯林四美高大妹林滿弟涂
潮阿四名又形迹可疑之林齊齊楊三歎魏棟芳林蚊蚊粘三弟
楊利佳魏棟恩楊善佳楊寶佳楊長杰楊秒秒十一名并被擄難
民翁大珠一名一併解由平潭廳訊明翁大珠委係被擄其林齊
齊等十一名亦係安分良民因在可門澳居住致兵役等疑有濟
匪銷贓情事一併拏解由該廳取具族鄰楊日景詹宗惠等切結

奏稿卷十一

九

分別保釋將盜匪林四美高大妹林滿弟涂潮阿四犯發交福清
縣批解到省由臬司督同署福州府丁嘉璋審明解勘經撫臣徐
宗幹代辦任事提犯覆訊據林四美高大妹二名均各供認聽從
逸犯鄭孝香出洋行劫各在本船接贓一次不諱遵照新例不論
接贓過船均依江洋行劫大盜立斬梟示例擬斬立決訊明後卽
恭請

王命飭委署福州府丁嘉璋護福州城守協副將祝善銓將該犯
林四美高大妹二名綁赴市曹處斬傳首示眾其林滿弟涂潮阿
二犯訊止被擄偏脅在船服役并未隨同上盜應均依洋盜案內
被脅止爲盜匪服役并未隨同上盜者杖一百徒三年例擬杖一

百徒三年仍照例遞籍鎖帶石墩五年限滿責釋文武應議及獲盜應敍各職名分別查取核辦未獲逸盜仍嚴飭水陸文武暨各舟師實力嚴緝務獲懲辦以靖海洋臣見駐紮延平督辦軍務督署公事均由臣自行辦理此案獲盜審辦緣由經撫臣移交前來除備錄供招咨部外謹會同福建巡撫臣徐宗幹合詞恭摺具奏伏乞

皇太后

皇上聖鑒敕部議覆施行謹 奏

議政王軍機大臣奉

奏稿卷十一

三

旨知道了所有文武應議及獲盜應敍各職名著分別查明具奏未獲逸盜仍嚴飭水陸文武暨各舟師嚴緝務獲以靖海洋欽此

查明臬司殉難詳細情形懇

恩優卹摺

同治三年十二月二十六日會福建巡撫徐宗

翰弁福州將軍英桂銜

奏爲查明臬司殉難詳細情形見經檢獲忠骸懇

恩優卹予諡并請建立專祠以慰忠魂恭摺馳陳仰祈

聖鑒事竊照福建臬司張運蘭前在武平勦賊失利力戰陣亡業經奏明在案茲據汀州鎮關鎮國汀州府朱以鑑及選用道張恆祥稟報見有武平難民李姓二人從賊中逃出暨受傷兵丁數名所述該臬司被狀情形甚悉據稱九月十一日該臬司擊賊於中赤地方連獲勝仗忽報另股逆眾繞撲武平縣城張運蘭急帶中軍勇隊馳援比到城已被陷賊眾徧野卽揮令副將雷照雄等奮

奏稿卷十一

十一

力迎勦斃賊無算詎後股悍賊從間道截出我軍首尾不能相顧記名總兵賀國楨湖南補用總兵王明高等被傷陣亡後軍遂潰中赤之賊乘勢夾攻我軍四面受敵雷照雄亦中矛陣亡該臬司見勢不支策馬陷陣大呼衝突手刃悍逆多名鏖戰數時中傷墜馬賊擁之入城厲聲罵賊不絕口至十四日午刻被戕遇害情形最爲慘烈武平縣知縣沈田玉永平司巡檢陶載坤典史雍德玉等亦先後遇害難民均目睹其事言之最詳武平旣復署知縣八十四偕同隨侍張運蘭多年之都司湯友德從亂屍中檢獲忠骸一段穿有藍布小襖表裏一色認係張運蘭臨陣時所穿者復於學宮覓其元面色如生當卽如禮棺殮護送汀州由該鎮道等稟

請具奏前來臣等伏查臬司張運蘭自咸豐三年隨同已故道員特贈內閣學士兼禮部侍郎銜諡壯武王鑫帶勇殺賊轉戰楚粵江西皖南福建諸省身經數百戰克復名城擒斬首逆無數謀勇兼優戰功甚偉茲因所部兵分力薄適遇巨股悍賊突至失利被圍裹創血戰卒以力盡罵賊捐軀因在軍殄除粵賊最多致粵賊懷恨報復遇害最慘忠義凜然足光簡冊應請
旨照布政使例從優

賜卹予諡祀湖南王鑫專祠并於死事地方建立專祠

敕下江西安徽湖南湖北廣東各督撫查明該臬司戰績宣付史館立傳以慰忠魂其同時殉難之記名總兵賀國楨等三十員暨

奏稿卷十一

十一

武平縣知縣沈田玉永平司巡檢陶載坤典史雍德玉均另繕清單伏乞

敕部分別議卹并祀張運蘭專祠以昭激勸其管帶三旅遊擊易培駿當逆賊撲犯武平縣城時不能率眾固守致賊抄襲官軍後路雖賊眾兵單究屬罪無可追應請

旨革職拏問以肅軍律臣等謹合詞恭摺具奏伏乞

皇太后

皇上聖鑒訓示謹 奏

同治四年三月初三日內閣奉

上諭前因毛鴻賓等奏福建按察使張運蘭在武平勦賊陣亡懇

請優卹業經降旨將張運蘭照巡撫例議卹并於湖南福建廣東各省建立專祠其生平戰績宣付史館立傳茲據左宗棠等奏稱查明該故員殉難詳細情形見復檢獲忠骸懇請予諡等語張運蘭著再加恩予諡忠毅以慰忠魂其同時殉難之總兵賀國楨等均著交部照例從優議卹副將尹定友等均著交部照例議卹知縣沈田玉等均著交部從優議卹以上三十三員均附祀張運蘭專祠俾彰忠節遊擊易培駿當賊匪撲犯武平縣城時不能率眾固守致賊抄襲官軍後路實屬罪無可道易培駿著卽革職拏問以肅軍律欽此

密陳提鎮司道府年終考語摺

同治三年十一月二十八日

奏爲密陳閩浙兩省提鎮司道府各官年終考語仰祈

聖鑒事竊照提鎮司道府等官例應於年終出具切實考語密行

陳奏

臣奉

恩命補授閩浙總督時因駐軍浙江於浙省文武各員性情才識無不隨時隨事詳加考察惟閩省相距較遠未及周知自督師入閩以來閩省各官或因公接見詢以吏治得失或接閱稟詳考其政績設施凡人材臧否輿論是非俱已默爲辨別得其梗概其兩省提鎮由軍營立功奉

旨特擢俱未履任見除浙省委署各缺亦多係由軍營遴員前往

奏稿卷一一

壹

尙可漸圖整理閩省則一時乏員刻下越級委護多不得力必須
迅

敕實缺各員到任或俟軍務肅清將軍營奏畱補用各員分署各缺整頓方有起色除署事及未經到任者例不註考外謹就見在各員分別出具切實考語密繕清單恭呈

御覽伏乞

皇太后

皇上聖鑒謹 奏

議政王軍機大臣奉

旨畱欽此

